

*Отам Насриддин Низом ўгли ва
онам Хосият Қоплон қизига*

ФАХРИЁР

АЁЛҒУ

шеърлар ва достонлар



*Қайда яшамасин одамзод, асли
Санижумон, Румо ё Шошканд.
Аслида биттадиф юракнинг касби:
Юрак эркска ихтисослашган.*



ФАХРИЁР

АЁЛҒУ

ТОШКЕНТ
«ШАРҚ»
НАШРИЁТ-МАТБАА
КОНЦЕРНИ
БОШ ТАХРИРИЯТИ
2000

Сўзбоши муаллифи:
АҲМАД А'ЗАМ

Фахриёр.

Аёлгу: Шеърлар ва дostonлар (Сўзбоши муаллифи:
Аҳмад Аъзам. — Т.: «Шарк», 2000. — 256 б.

Ўз2

© «Шарк» нашриёт-матбаа концерни
Бош таҳририяти, 2000

ШЕЪР — НОМАЪЛУМЛИККА ТАНИШ ИШОРА

«Аёлгу» — гаройиб сўз: тарихнинг оҳанги келади, канақадир чўл, канақадир тарих, эски бир чолғуми, билмайсан, ишқилиб, нимасидир таниш, илғайман деганингда илинмайдиган бир қизик маъно, нимадир таниш-нотаниш.

Таниш-нотаниш нарсанинг ўзи шеър дегани. Хамма томони, хамма маъноси таниш-тушунарли бўлган равон, музайян сўз — аслида шеър эмас, шунчаки уктириш, ёки сен яхши биладиган маъно билан сени яна бир карра чиройли таништириш. Шу, холос. Бу ҳам балки керақдир, ўзинг яхши биладиган, ҳар куни суҳбатлашадиган одаминг билан бугун бўлиб, ёдда қолмайдиган, шунинг учун эртага яна қайтариладиган ҳамишаги суҳбат.

Шеър — номаълумликка таниш ишора бсрадиган, номаълумликни ўқиганнинг кўнглида давом эттириб, фақат унинг ўзигагина мужда нарсаларни очишга туртки, мухлиснинг кўнглидаги унинг ўзи учун янги фикр. Шу маънода, бир шеърдаги муҳаббат — бу минг муҳаббат, минг одам ўқиса, шунча муҳаббат туйғуси. Лекин маъно таниш бўлса-да, яна тўлиғича айтилса, бу атиги бир шеър, холос.

«*Ечилмаган кроссворд каби катаклари бўм-бўш қафаснинг. Бўм-бўш қафас қафаслар ичра чиройлиси, энг гўзали, энг...*» — энг... нима? Шеърда шу «энг» ҳам бор, ҳам йўқ. Хис қилганга бор — унинг кўнглида ўзи уйғонади, бошқа хис қилганларнинг кўнглида бошқача уйғонади, уйғониш — шахсий: «*Умуман, рўй бермас воқеа, Рўй бергучи менман, умуман. Мени излаб юрар моҳият...*», муҳаббатга ўхшаган. Хамма севади, лекин хамма бир аёлни эмас, ҳамманинг кўнглида шахсий минбари бор, яхши шеър шу минбарга таклиф қилади.

«*Ҳаёт, сен шаробсан, майсан бир сузим...*» — бир сузим туйғу таъсир қилса, ҳар кимда унинг ўз тасаввурини уйғотса — шу шеър «*мени излаб юрган моҳият*» бўлади. Мана, бир мисол: «*Кўнги куйиб бўлди, инчунун, ўзгачадир мазмуни дарднинг...*» Бунга бошқа шеърдаги сатрлар боғланади: «*Энг..., энг...*» имконият чегарасидир, уни фақат шоирлар бузар».

Яна «аёлгу»га қайтсак, «*излаб тополмаганим аёлгу олиб чалолмаганим чанқовуз чолиб чанқовузнинг бўғзидан куйлар қаталаб чиқар...*»

Шу ерга келганда нимадири ойдинлашади. Балки бу ростдан ҳам чолғудир — юрак чолғуси, ҳарқалай нимадир куй бор: излаётган хамма нарсани: муҳаббатни, эътиқодни, умуман ўйга таянч бўлган бир Туйғуни излаётган кўнгилини тушуниб эмас, англаб бошлайсан. Фахриёрнинг шеърларини ўз кўнглингда давом эттирасан, тўғрироғи, ўша аёлгу тахайюлингда бир сузим-бир сузимдан туйғу — таассурот уйғота бошлайди: «*ой юзинг доғларига қараб йиғладим учаётган ру-*

ҳимнинг темир қанотларига тевралар армон кўз ёшларимдан қанотлари ивиб кетган мутаассиб юрак шакарлари тўкилиб кетган янтоқнинг устида жавраб ўлтирар ва яширар қанотларини ичига эътиқод каби азонда азон йўқ хазон бор муаззин хазон»... Яъни ўша қадим чолғу чалина бошлайди; бу куйнинг тиними йўқ, узилмайди, нафас ростламайди, гоҳ теран, гоҳ юзалаб, гоҳ сўзга қоқилиб, қоқилганда инграб, гоҳ кўтарилиб бир сингрокда кетади, шунинг учун ҳам унда сатрнинг бошламаси, сўзнинг тиниши, одатий тўхтамлардаги катта харфлари ҳам йўқ, худди нотекис ўзанда оқаётган битта тошқиндек қуйилиб келаверади...

Мен Фахриёрни кўпдан бери танирдим, шеърларини ўқиганман, ўзи билан кўп гаплашганман, лекин «Аёлғу» муаллифи, барибир, менга нотаниш бўлиб чиқди янги шоир сифатида. Яна янгилликка кириб бораётган шоир сифатида унинг изланиш йўлидаги ўзгача суриниш-тойишларини ҳам сезгандек бўлдим. Менга айрим шеърлари, баъзан сўз танлашда ошиқликлари шундай туюлди. Лекин у, барибир, шеърнинг шундай сакта жойларида ҳам ўзидан узоқлашмайди, сўз ясашларида ҳам навқиронлик бор — топганининг у ёғида яна нималар борлигини билишга ошиқади ва, табиийки, айниқса кўнгил гўзаллигидан шошган одам буни гўзал айтмайди, шуниси билан ҳам самимий. Яна шеър балки шудир...

Харқалай, Фахриёрнинг шеърлари кўнгил хуши учун роҳат қилиб ўқийдиган эмас, арғумоқнинг дағал ёли тортилган камонча билан чалинадиган созга менгазайди, балки аёлғуси шудир; кўнгилни безовта қилади, тирнайди, титади, фикрни туртади: тарих ҳақида, эътиқод ҳақида, муҳаббат ҳақида, табиат ҳақида, умуман, Уйғоқлик ҳақида одамни ўзи билан ўзини баҳс қилишга далда беради. Фахриёрнинг янги шоирлиги ҳам балки шудир.

Шеърни тушунтириш кийин, бир одамнинг изоҳи — бу битта тушунча, минг одам минг хил ўйлайди ўқиганда: «Умуман, рўй бермас воқеа, Рўй бергучи менман, умуман. Қофиялар қилади таъқиб, Бўғмоқ учун шайланар бўгин. Пойлаб юрар қайдадир таъқиқ, Кўтаргизар гоёлар тугин. Мен улардан қочайин қайга? Қай жанубга кетайин учиб? Бирор кимса кутмаган жойда Тўсатдан рўй бермоқлик учун!» Шеър шу — тўсатдан бир одамнинг дилига келадиган, бошқа одамнинг дилида тўсатдан рўй берадиган! Битта мен шундай тушундим. Сиз-чи? Бунга жавобан тўпلامдаги шеърлардан таассуротингиз билан ўзингиз топасиз кўнглингизда.

Албатта, тўпلامга сўзбоши ёзганда «энг...» деган мактов айтгингиз келади. Лекин «Аёлғу»га шу мактов шарт эмас, менинчча, чунки ундаги шеърларни ўқиб-макташ ўқиганларнинг ўз иши бўлиб қолади. Сиз ҳам бир ўқиб кўринг. Мен ўқиганда шу хаёлларга бордим, сиз ўқиганда ўзингиздаги бошқа — теранроқ хаёлларга борсангиз керак.

Аҳмад АБЗАМ.



ДАРДНИНГ ШАКЛИ

• • •

Хаёт, сен шаробсан, майсан бир сузим,
Йигирма түрт йилки тўймадим, аё.
Юрар май ичинда гуссалар юзиб,
Сокиё, айш қаён, укубат қаён?

Гоҳо тўйиб кетар севгимдан аёл,
Кўз ёшлар тўйдиарар — ичгум бир ўзим.
Мен сендан, барибир, тўймасман, ҳаёт,
Кўзинг оч, кўзим оч. Очкўзим — кўзим.

Тахир бир шаробсан, о ширин ҳаёт,
Сабрим косасига сени қуярман,
Ичарман кўз ёшни ичганим каби,

Тотинг унутмагай ёдим умрбод,
Сени қуяр жомим, нимкосам — сабр.
Мен унга аёлнинг исмин ўярман.

1987



ТОНГИ РЕГИСТОН

Азон айтар муаззин минорлар,
фалон йилки,
карвонсиз саройлар ва хонақоҳлар,
бари-бари бойқушнинг мулки.

Барча ухлар, йўқсил, хотиржам,
тонг уйқуси руҳафзо.
Эгатларда чарчаган элга
ухламоқ афзал.

Кўрпаларга илдиз отади
унинг уйқуси.
Йўлбарс хайдаб кетар бир кеча
оҳуларин туйқусдан.

Ибодатга чиқмайди ҳеч ким.
Мустабид сахар
кимсасиз шаҳарда
юлдузларга беради захар.

Кечани эса у
кудукқа ташлар.
Кейин ухлаётган раият устидан
ҳокимият юргиза бошлар...

Тонг отади Регистон узра,
гумбазларга чўкади осмон.
Яна дўст бўлади тунги душманлар,
гулга айланади яна ёсуман.

Яна бир кечани тонглар отади...

1987

АКСИЛФАЛСАФА

Макон йўқ,
замон бор.

Бордир замонда
ижарага турган моддиюн авлод.

Замонга боқмаган авлод ўзидан
худо тортиб олган маконни
қайтариб беришни сўрар даходан.

Бироқ даҳо тангри эмасдир,
унинг қўлида
фақат ғоя бор.
Тирикчилик килиб бўлмас ғояда.

У макон эмас,
замон ҳам эмасдир боққанинг билан.

1989



АКСИЛЭКОЛОГИЯ


Пайхон қилар одамни экин,
ташбих надур, далаларнинг ўзи бий.
Чўллар уни қувлаб боради,
ё раббий.

Одам кетиб борар,
худоларга етмайди доди.
«Қизил китоб»га уни

ёзмокка эса

йўқ экиннинг саводи.

1985





Одам тарошламоқ бўлсангиз тошдан,
тошни силанг,
имкон қадар кўргазинг меҳр.

Тошлар фақат шафқат олдида
ҳимоясиздир.

Тошга гуллар тутинг,
нимпушти гуллар —
шафқат рангидаги гулларни тутинг.

Тош, албатта, чўзар қўлини,
гулингизни олар,
 қўлингизни ўпар,
йиғлаб юборади, ишонинг, шу тош.

1983

ҲУРЛИК

Ечилмаган кроссворд каби
катаклари бўм-бўш қафаснинг.
Бўм-бўш қафас қафаслар ичра
чиройлиси, энг гўзали, энг...

1984



НАҲОТКИ

Наҳотки,
пайкални
уммондан бўлак
менгзайдиган ҳеч нимарса йўқ?

Наҳотки,
шу оппоқ мавжлар остида
ётар чўкиб кетган кўҳна тамаддун?

Наҳотки,
Туркистон
Атлантида сўзининг
таржимасидир?

Наҳотки...

1988



Сени сендан изладим,
йўқсан.
Эгалари кўчиб кетган уй каби
бўм-бўш турибсан.

Фақат ташландиқ уйда
эсдан чиқиб қолган мушук мисоли
кўксингни ичдан
тирнар бир нима...

1990

КУТАЁТГАН ОДАМ

I

Гуноҳ эрур эндиги соғинч,
Гарчи соғинч сотқинлик эмас.
Хиёнат ҳам эмас бу соғинч,
Демак, менда гуноҳ йўқ, демак...

II

Соғинч менинг Ватаним эрур,
Қароғингдай мўъжаз бир Ватан.
Энди унинг чегарасини
Мен бахтлардан қўриб ётаман.

Агар соғинч фуқаролигин
Қабул этмоқ қасдида атай
Бирорта бахт бахтимга қарши
Чегарани бузса дафъатан,

Мен азалий удумга кўра
Шафқат қилмам у нобакорга,
Қиладурман уни сазойи,
осадурман ваёки дорга.

III

Кутаётган одам кутмас ҳеч қачон,
унинг қўзлари
ямлаб ташламайди
ташрифи кутилган одам йўлларин.

Кутаётган одам бешафқат,
зиндонга ташлагандай
кутган одамини солар ёдига,
ёинки
тушларига қамаб қўяди.

Ва сўнгра
эсидан чиқариб юборар
қамоқ муддатини ўтаб бўлган
махбус эрка чиққани каби,
эсдан чиқиб у тўппа-тўғри
кутаётган одамнинг қошига келар.

1989

ЭКОЛОГИК ШЕЪР

Дарё,
сени қандок чўмилтирамиз,
қайда ювинарсан, булғанчиқ дарё?
Ҳаммомга олиб борайинмикин,
қайноқ сувдан қўрқармисан ё?

Лойқам менинг, булғанчим дарё,
елкангга совунлар суриб қўяйми?
Елканг қани, беяғрингинам,
елканг йўқлигига қуяйми?

Дарё,
сен заҳар ичгансан, хастахонага
олиб бормоқликнинг ўзи бир ғурбат.
Шаҳар-ку нотаниш, қишлоқда эса
бир хастахона бор ва у ҳам тирбанд.

Дарё,
имтиёзлар гувоҳномаси
сенда йўқ-ку?
Навбат сафлари ҳарёқ.
Дўхтирларга навбатда туриб
қуриб кетмасмисан, касалманд дарё?

1985

ХОТИРА МАШҚИ

Сен шеърни қўй, шоирларни қўй,
Кўз ёш — малол, муҳаббат — маҳол.
Сен қасд эмас, қасосингни суй,
Сен яхшилаб нафратни ёд ол.

1988



Умуман, рўй бермас воқеа,
Рўй бергучи менман, умуман.
Мени излаб юрар моҳият,
Қолип излаб юрар бегумон.

Қофиялар қилади таъкиб,
Бўғмоқ учун шайланар бўғин.
Пойлаб турар қайдадир таъкик,
Кўтаргизар ғоялар туғин.

Мен улардан қочайин қайга?
Қай жанубга кетайин учиб?
Бирор кимса кутмаган жойда
Тўсатдан рўй бермоқлик учун!

1989



Қўлларим бўм-бўш.

Кўтармоқчи эдим бошимга сени
шу қўлларимда.

Энди бўм-бўш қўлларимни
бошимдан баланд
кўтаролмай яшаяпман.

Бўм-бўш қўллар оғирлиги.

1988

СУЛУК

Даҳога талпинма, даҳодан талпин,
Маънисин унутма қадим оятнинг.
Даҳолар — жодугар, ғоялар — фолбин,
Кўзларин боғлайди инсониятнинг.

Қўлларидан тутгил устоз ҳаётнинг,
Сифинчга — сифинчдан — бошлагин, қалбим.
Тазарруъ тозартса бизни, шоядким...
Кўхна туркуларни шивирлар лабим.

Куфрдан излабон Ҳақнинг висолин
Ҳарис ғояларга таланган устоз
Ортимдан эргашар шогирд мисоли...

Яна тупроқ бўлар алданган ақл,
Шамоллар рух бўлиб қайтажаклар боз.
Дардларим кийина бошлайди — шакл.

1989

АРАФА

Деворга осиглик қилич
зангларини тўка бошлади.

Ярақлай бошлади тўсатдан
янги ой шаклида.

Лекин девор қизил эди.

1990

* * *

Кимнинг жилмайишин олдим ўғирлаб,
Кимнинг табассумин тортдим юзимга?
Бегона табассум сифмади, зўрлаб
Тортавердим уни лекин ўзимча.

Фалокат кўргазди шунда бўй-энин:
Бир чети йиртилди табассумнинг «шарт».
Сири фош этилган жосусдай мени
Бехос таниб қолди излаб юрган дард.

1986



Хиёнат қилолмас ҳеч ким пулчалик.

Дўстлик бўлиб туюлар, хатто,
ганимлар душманлиги
душманлиги олдида пулнинг.

Қирқ газли шамшир билан
кесиб бўлмас пулнинг бошини.
Дарвоқе, пулнинг боши йўқ,
унга бош бермаган қизғанчиқ эгам.
Йўқса, сал инсофга кирармиди у,
ўйлаб кўрармиди...

1985



Вақт бизни кўнгилчан қишдан айирди,
ҳаммаёқ қор эди, юмшоқ ва гуртук.
Момик поёндозда юрган шоҳ каби
биз қорни тепкилаб бемалол юрдик.

Бу ёғи баҳордир, баҳор бешафқат,
хатто йўлакларда қизғалдоқ унар.
Энди яшаб бўлмас гулларни топтаб,
бош билан юрмоқни қилмасак ҳунар.

1987

ЗЕРИКАРЛИ ШЕЪР

Сиз билан баҳс қилмам, Демосфен,
хотирингиз жам бўлсин, тақсир.
Ўзни оқламоқчи эмасман,
сўз ҳам менга эрмак эмасдир.

Оқлик фариштага ярашар,
деворларга ярашар оқлик.
Сўзамоллигига яраша
оқ бўлишга сиздайлар ҳақли.

Лашкар бўлган сўзлар сиз учун,
енгиб берган рақибингизни.
Не баҳсларда улар шон қучиб,
кўтаришган бошига сизни.

Мен эсам, мен сўзларни бошга
кўтараман...
Ўзгадир мақсад.
Балки, шундан йўриғим бошқа,
балки, шундан мағлубман аксар.

1988



* * *

Баҳор ҳеч нарсани эсдан чиқармас.
ҳар сафар гул қўяр
ҳар бир қабр пойига.

1988



* * *

Сенда айб йўк, биламан,
кетмоқчи эмасдинг қошимдан.
Сени авраб олиб кетди йўл,
лаганбардор йўл.

1988



Сиз уни кўкларга кўтарманг бунча,
нима ҳам қиласиз гуноҳга ботиб?
Сабри чидамайин учгунча,
исташиб парвозни,
учаман до-оо-дд, деб,
Заминга қайтолмай юрганлар озми?

1985



Йиллар ўтди.
Шоир айтмоқчи:
Муҳаббатнинг сочи оқарди.
Кўнгил куйиб бўлди,
инчунун
ўзгачадир мазмуни дарднинг.

Энди, ҳатто, ҳеч қачон, ҳеч гап
бўлмагандай ўртада худди
қариб қолган муҳаббат ҳақда
сўзлаш мумкин бемалол, жиддий.

1986

КУЗГИ ШЕЪР

Турналар кўшиғи — энг маъюс кўшиқ.
Ундан-да мунглироқ куйлаши мумкин
фақат шоирлар.

Хазонлар шитири — энг сўнгги товуш.
Навбат — шоирларга!

«Энг..., энг...» имконият чегарасидир,
уни фақат шоирлар бузар.

1985



КУЗДА

Сариқлик — тош ранги,
ялмоғиз тошнинг.

Оғирлаша бошлар япроқлар —
тош рангига ишкибоз улар,
тошларнинг ёнига тушгиси келар.

Ўғлининг, шаҳарга кетаман, деган
хархашасин тинглаётган онадай
безиллаб турибди дарахт.

Ваҳолонки, ҳар қандайин тош,
ҳатто, кўнгил учун ҳам
япроқлар ўрнида осилиб
турмас ҳеч қачон.

1983

ШАККОК ТОШ

Сиртига сув юктирмаган тош,
Сен шаккоксан.

Гапнинг рости-да.

Неча йилки, қуруқ ётибсан
Оқаётган кўз ёш остида.

1986

КЎРГАЗМАХОНАДА

Биз деворга, ром остига
ўтган кунларни осиб қўямиз
(ром очиб чиқади бизни).

Сўнг осифлик ўтган кунларни
томоша қилишни яхши кўрамиз.

Томошага кетган вақт эса
кўчага ҳайдалар.

Боиси:
ҳеч қачон томошабиндан
чиқмас қахрамон.

1985



Муҳаббатнинг кўйлаги оқдир,
уни ҳар тун тушларимда киясан.
Ўнгимда эса...
тошнинг оқлигига қараб йирлайман.

1987

ТАДБИРКОР ОДАМ

I

Энди мен бошқатдан бошлайман
барини, барини, барини.
Кўзларимдан юлиб ташлайман
ўсиб кетган нигоҳларимни.

Ўзгартаман дунёқарашни,
ташаббуслар билан чиқаман.
Оқизмайман беҳуда ёшни,
кўзларимга пахта экаман.

Хар йил уч юз олтмиш беш карра
ҳосил олиш мумкиндир кўздан.
Ўз холича ўсар, у зарра
заҳмат талаб этмайди биздан...

II

Мухими шу: оғзим тикилган
сўрамаслик учун сиздан қарз.
Кўзларимга пахта экилган —
шундай гўзал бизнинг ҳаёт тарз.

Мухими шу: қарзларга ботиб,
юрмам емакка нон ахтариб.
Тирикчилик қиламан сотиб
кўзларимдан чиққан пахтани.

1989

ХАВОТИР

Вақт саҳроси.
Кетиб бораётган тоғлар қарвони.

Бурнидан ип ўтказилган
тоғлар қарвони.
Ортига ўгирилиб қаролмайдиган
тоғлар қарвони.

Дарвоқе, юк:
тошларни келажакка
ташиб кетмоқда тоғлар.

1986

БАҲОРГИ ҲИЖРОН

Бойқуш, бокма, кўзларингни юм,
Биласан, йўқ хароба деган.
Демак, энди, демакки буқун
Сабаб йўқ сен қувонадиган.
(Юрагимни оламан қўлга...)

Хароба деб мени қистама,
Бу куз эмас, бир парда паст туш.
Бу баҳордир, атроф гул, чаман,
Кетгин, бевакт ташриф қилган қуш.
(Яшираман ортимга уни.)

1985

МАНЗАРА

Баҳор-да.
Тошни кўқартгиси келади ҳатто,
яшил байроқ кўтартиргиси
келар унинг минорага ҳам.

Баҳор-да.
Қаҳри келса, қаҳри кўп ёмон.
Кўқармаган не бўлса,
унинг нафратига бўлгуси дучор.

Булутли кун.
Кўқармаган минорани
осди булутга,
олиб қўйди остидан ерни.

Булутга осилиб турар минора.

1984



Юрак узлатнишин Яссавий каби
ёлгончи дунёни кечириб яшар.

Юрак —
Усмон Носирга хаётлигида
берилган яккаю ёлғиз мукофот.

Юрак қушдир.
Қафас билан бирга туфилган
қуш.

Патларини қонга ботириб
шеърлар ёзар ОЗОДЛИК ҳақда.

1987



Шаънингиздан ўзга бир шаън йўқ —
Куйланмаган, мақталмаган шаън.
Лол этасиз бир сиз ҳаммани
Гулдайин пок шаънингиз билан.

Қўшиқ, ҳатто, шеър бўлса ҳамки,
Айтиб бўлмас, йўқ, шаънингизга.
Оқ кўйлакка теккан доғ каби
Ярашмайди мақтовлар сизга.

1986



Бахтиёр бўлишим мумкин эмиш,
Шундай ёзилганмиш пешонамга.
Лекин мен
ўқиёлмадим
ўша ёзувни.

Кўзгуга қарадим.
Пешонамга ёзилганлари
тескари кўринар эди кўзгудан.

1988

ЁЗИҚ

(овоз чиқариб ўқимаслик шартли билан)

Гулнинг косасига куйиб ичар Вақт
мени лиммо-лим.

Жоним қурбақага айланади:

ВАҚҚ!

Ким,

девмикин, жонимни қирқ фариштага
нимталаб нонушта ҳозирлаётган.

«Карнай бўлсин иштаха».

Ой эса ботган.

Ботқоқларга ботиб қолган Ойнинг оёғи,
қаталайди нилуфар.

Юлдузлардан шуълалар соғиб
унга ичиради парилар — куффор...

Нилуфар кўйлагин бозорга солар,

Тангасин санайди сув парилари.

Бозорга айланар Солор,

Тун — ярим, ярим тун, тун — ярим...

Нилуфарнинг кўйлагини сотиб олгани

Ёсуманнинг нафақаси етмайди.

Қолган

гулларнинг матоҳи ўтмайди.

Хасаддан куйиб,

қорни оғриб қолган сабурлар

тувақда ўтириб чиқар тун бўйи.

Минг йилда бир гуллайдиган қуманжир

жабрдийда...

Унинг тиконига бўлмас харидор

кирпи — Ван Гог (эссиз) —

соч-соқоли пахмок чолдевор

қулоғин кесиб,

юборади кунгабоқарга.

Кунгабоқар боқмас қайрилиб.
Тонг — чолдевор оқарар.
Айрилик, айрилик, айрилик...

Вақт мени ичади, ичади,
боши гир айланар, айланар.
Бу кеча, бу кундуз кечади,
най-на-най, най-на-най, най-на-най...

Хаво ун^{уш} тортади — худо беҳабар! —
сархуш вақтнинг бошида.
Буғдойини тортиб олар.
Табарий
тарих битар форнинг тошига.

Тарих — гуноҳлар — турнақатор.
Ёзикка термулар кўр(савод) сичқон.
Девнинг харамидан қочган қурбақа ҳам
форга келиб битикларни хиҷжалар, не тонг!..



Тўзғиб кетар асрлар —
қасирға.

Фор кетади ўрнидан туриб —
қудук.
Қулоғига симоб сингари эриб,
қурбақа дудук-
ланиб ўқиётган тарих сингади:
куррр,
куррр,
куррр...

...Дедал учиб боради,
дедалуслар термулар.
Икар учиб боради,
«икарус»лар ўрмалар.

Паровозлар бари
пишқирар тутаб.
ғилдиракларин
ҳикичоқ тутар,
и-и-к-карр,
и-и-к-карр...

Қарғалар
қарғанар:
қаррр-и-қаррр,
қаррр-и-икаррр...

Хамминг кўзи осмонда,
Осмонга тикилар йилқилар...

Нега учмас зарғалдок,
нега қарға қарғанар?
Қайда қолди Марғилон,
қаёнларда Фарғона?

Икаррр.
Халойик
осмонга кўз * тикар.
Малоик

кўринмас. Икардан бошқа
учаётган бир кимарса йўқ.
Бургут қани? Қашқал-
докқа тегдимикин ўқ?..

Халойик лол боқад
кўл узолмай ёкадан..

Қанотлари қирқилган
сандувочлар чирқиллар.

Уялари кетмоқда ёниб,
сув таший олмас.
Қизилиштон иштонин
бўяб олган яшилга...

Қарғалар
қарғанар:
қаррр-и-қаррр,
қаррр-и-икаррр.



* Кўзларим сўйлашни ўрганди,
энди зарурмикин менга бу тилим?

ба
Сулаймон наси истаб келади
хат
раззоқ қарғаларнинг ортидан.
Лекин элаги
қарғишларга тўлар ёрти кам:

қаррр-и-қаррр,
қаррр-и-икаррр...

Девор — қар,
эшитмас.
Кудук — ғор,
бешиқмас.

Бу ерда моялар
етмас вояга.

Шу ерда узилар ривоят,
ривоятлар этади давом.
Ёзиқлар — гоҳ сура, гоҳ оят,
қулоқ тутар сичқонлар — авом.

Кунгабоқар қулоқни тунда
ғор — қудукқа ташлаб юборар.
Қамиш униб чиқади ундан,
ё раб...

Бозингар ютган қилич сингари
қудукнинг бўғзига қамиш қадалар.
Чўпон йўқ битта най ясаб олгани,
қишлоққа қайтмади ҳали подалар.

Хотамни синагани
Аржуна
шаҳид бўлган Синадан
қуруқ қайтар ўтинчи чол
бол-
таси хуржунида.

Саройда ўтин йўқ, Қаббада — санам,
бутларни синдирган Иброҳим — осий.
Осий бўлсанг, мабодо, сен ҳам,
Ҳақ ўзи ёрлақасин.

Намруд
амри:

— Ўтда куйдирилсин осий Иброҳим!
Кудукдаги қамишни
ўриб келар роҳиблар.
Қурбақа Билғамишни

уйғотади — уйғонмас сира.
Ўзи сув келтирар Намруд ўтига.
Ўт гурламас, гуркирар
Хадича момоннинг ковак тутидай.

Қамишлар гул бўлар, бақо гуллари
(қурбақа — Афлотун),
илон ташиб кетар уларни,
Билғамиш — ғафлатда.

Худолар ғафлатда қарийди.

Илон пўст ташлар —
ёшараётган орийни
ташна
қилар осий қон,
альамон!

Фиръавннинг тобутидан ўрмалаб чиққан
илон
куёшнинг белига чирмашар.
Пуштини сўради,
лак ва лак ўғлон
белларидан сидрилиб тушар.

Гўрлар қисир — Ватан хароба —
тупроқ тортар ўйиқ кўзига.
Тортилмайди ароба.
Илон пуштни суртар юзига.

Парига айланар, у бир парирўй,
шоҳнинг ишқи тушгудай.
Эрган тўй бўлади, базми Жамшид тўй.
Хохлама, худой.

Худо хоҳлар, келади қирон.
Қалдирғочлар сотилиб кетар.

Ариларнинг тиллари бийрон,
тар-
танакнинг оёғи фалаж —
улов.
Сибирларда қолиб кетар, ё фалак! —
юракдаги маъжусий олов.

Оловга исинар набийлар қабиласи,
валилар,
ходийлар,
солиҳлар,

олтин қазиб чарчаган —
зулфиқори белкурак Али,
шамшири чўкич Темир,
дошқозони аравагалтак Яссавий.

Искандар *лар тулпор — тобутин
миниб ер остига кирар,
совути
совийди тупроқ ўрнига,
кўз ўрнига ўйилар чиғаноқлар,
бош чаноғи
оёқ бўлар мустабиднинг қўлида.

ут
Оёқ тўла қонга ботар унинг мур лари — ол!
ид
Заххоқлар улийди,
мияхўр шokol.

Манқалда хотира пиширар Зардушт,
боласининг миясин чақиб...
Набийлар — фарзандкуш, уммат — падаркуш,
хотира очлиги қилади таъкиб.

* Шохона тобутдан ташқари
чиқазилган жаҳонгир қўли,
ибрат эмас, туюлар менга
унинг сўнги найранги бўлиб.

Садакага чўзилган қўлни,
вожабким, соддадил авом,
ўтса ҳамки минг йиллар,
бизга ибрат қилиб кўрсатар ҳамон.

Урён Одам Атонинг
занжир ўтказилган бурнидан
лаззат симиради аёнлар,
чаёнлар.

Илон кийиб кетган пўстинин,
анжир тортиб олган авратпўшини.
Пиймасини ўзи берган қуёш — дўстига.
захга бериб ётар тўшини.

Бор бисоти таланган
Одам Ато — қаландар.

Гина эмас, соғинч* бор
унинг ашуласида.
Мутойиба, ўкинч бор.
Йиғлагинг келадир, гоҳи куласинг:

«Вақтнинг боши — ёрғучок,
Вақтнинг боши тегирмон.
Ўтин тердим бир қучок,
Ҳаво, ёпиб бергин нон...

Нон қил десам, қуюқ қилар,
Ош қил десам, суюқ қилар.
қуйдим хотиннинг дастидан...»

Ҳаво ун тортади,
Ҳаво ун тортади...

1991 — 1996



* Таҳрир қилиб бўлмас соғинчни,
қўчириб ҳам бўлмайди оққа.
Ў — варағи йиртилган китоб,
у хамиша муҳаббат ҳақда.

Соғинч бахтмас кўникмоқ учун,
сабр ҳаммас, зар бўлса таги.
Соғинч асли видодан сўнгги
кутмаётган одам эрмағи.

УЧ БИТИК

1

Дарахтланар узлатгир боғлар,
Адирларда яшил издиҳом.
Юракларда ишқланар доғлар,
Мусибатлар арир — куз деган...

Майсаларнинг киёк тилида
Тошлар эрир новвот мисоли.
Михларни суғурар қўлидан
Масиҳ баҳор шаҳид Исонинг.

Қўзигуллар қуёшни эмар,
Илон каби изғир печаклар.
Ялангоёк турар — бой эмас —
Пуллариға куйган чечаклар.

2

Борлиқ — матал, йўқлик ҳам — матал:
Гиёҳлар — эрк — тўшалган гилам.
Гуллаб ётар шу мўъжаз Ватан
Қўллардаги кишани билан.

Етказса-да шохға жарчилар
Ўйламасдан айтган ҳар сўзни,
Бегонадир тасарруф гарчи,
Бахтиёр сезасан ўзингни.

Бахт — муҳаққак, қайғу — омонат,
Муҳаббатинг, гарчандки, осий.
«Фажр» ўрнига гарчи тумонат
Қалдирғочлар ўқийди «Ёсин»...

3

Хиёнатни билмайди баҳор.
Чилвир сочли қиз каби маъсум.
Бунда мавжуд ҳар битта оҳанг
Айрилиқлар янглиғ муттасил.

Баҳорники эмас айрилик,
Баҳорники эмас бу видо.
У гамингга боқмас қайрилиб,
У бахтингдан қилмагай жудо.

Ҳеч ким билан иши йўқ унинг,
Ўз ҳолича гуллаб ётади.
Сен баҳорга тош отган кунинг
Дарахтлари куртак отади...

Унинг сенга хизмати холис,
Тушларингни Ойга ичирар.
Бахтга қарши, ўнг келиб қолса,
Ижобати учун кечирар.

Хиёнатни билмайди баҳор...

1991

ИМКОНИЯТ

Имконият — дастёрим менинг,
югурдагим — имконият.

Ҳар куни кўзимни очишим билан
ўсиб кетган умидларимни
киртишлаб қўяр.

Армонларни сугорар ҳар кун.

Дон сепеди ҳижрон қушига.

Лекин ҳар замон
ақл ўргатади у аблаҳ менга:
— Ойни этак билан ёпиб бўлмайти, —
дейди масалан.

Менинг жоним чиқар.
Шунда у лаънатига
ёдлатаман шиорларни,
токи у ўргансин ушбу замонда
яшашнинг маъниси мақолдан эмас,
шиордан иборат эканлигини.

Ойни этак билан ёпишни бизга
мақол эмас, шиор ўргатар.

Демак, мақол эмас, шиор кенгайтар
Имконият имкониятин.

1985

БАХШИНИНГ СЕВГИСИ

(XIX аср)

Сангижумон элида Раҳимбойнинг Махфират исмли бир хурлико кизи бор эди. Кўнгилнинг кўзи кўр эканки, мўйлаблари эндигина сабза уриб келаётган Собир бахши ўзидан 2—3 ёш катта шу хурлиқони суйиб қолибди. Лекин у бой-бадавлат хонадоннинг кизи эмасми, шу ялангоёқ мени ўзига тенг кўрдими, шу ҳали она сути оғзидан кетмаган гўдак менга кўнгил кўйдими, деб гапни узиб юбормоқчи бўлибди.

Бахши зоти ўр бўлмайдими, барибир, ўз билганидан қолмабди, хурлиқонинг қўлини сўратишини кўймабди. Киз ҳам, йўк, дейишдан чарчамабди.

Кўнгил кўр бўлса-да, нозик бўлади, ўр бўлса-да, нозик бўлади. Кўнгилнинг ёши, кўнгилнинг қариси бўлмайди.

Куйгани қўшиқ бўлибди, суйгани қўшиқ бўлибди бахши шўрликнинг.

На кўргулик тушмиш менинг бошим,
Қон йиғладим, дунё чўмди ёшима,
Ёр, юрагинг Сангижумон тошима,
Нечун ёшим сен қатори бўлмади?

Оқтов ёқдан от дупури келади,
Даралари гумбурларга тўлади,
Паризод, бу сенинг совчинг бўлади,
Нечун ёшим сен қатори бўлмади?

Ёшим дарёсига чўкиб бораман,
Дардимни сен эмас, тошга ёраман,
Энди бир вужудмас, минг бир пораман,
Нечун ёшим сен қатори бўлмади?

Кўнглимдай совийди тунлар тупроғи,
Кўксимга ботади Ойнинг ўроғи,
Қошингдай қародир зулмат сўроғи,
Нечун ёшим сен қатори бўлмади?

Ғаним йўк, юрак — ишқ қалъаси вайрон,
Сўроқдай эгилдим, эгилдим ёмон,



Энди мен сўрокман. Жавоб йўқ замон,
Нечун ёшим сен катори бўлмади?

Сен кетарсан ўзгаларга ёр бўлиб,
Мен қоларман бунда зору зор бўлиб,
Бир дунёмас, икки дунё тор бўлиб,
Нечун ёшим сен катори бўлмади?

Тақдирлари қўшилмаган экан, қизни тўю томошалар
билан ўзга юртга келин қилиб олиб кетишибди.

Собир бахши куйиб-куйиб, куйлаб-куйлаб қолаверибди.

Кунлар ўтибди, ойлар ўтибди, йиллар ўтибди, лекин
қайтиб бошқага кўнгил қўёлмабди.

Бахши-да, қартайиб қолганига қарамай, давралар-
нинг гули, йиғинларнинг булбули бўлиб юраверибди.
Бир куни ундан ёлғизлиги сабабини сўрсалар, кўнглига
қўл солиб кўрсалар, дўмбирасини тиринглатиб, йиғин
аҳлига қаратиб, бир сўз деб турган экан, яъни будир:

Юрак экан, юраклигин килди-да,
Нотенгига кўнгил кўяр бўлди-да,
Омад экан, ўзгаларга кулди-да,
Мен куйганим стар икки жаҳона.

Болаларим, мендай ҳеч зот куймасин,
Нотенгига асло кўнгил қўймасин,
Мухаббатнинг насибасин киймасин,
Мен куйганим стар икки жаҳона.

Не алпларни ишқ тахтига ўтказдим,
Куйлай-куйлай муродига етказдим,
Ўзим бўлса, умримни тоқ ўтказдим,
Мен куйганим стар икки жаҳона.

Тенг тенгини топса, қандай яхшидир,
Ёр вафоли бўлса, асли бахт шудир,
Сизлар куйманг, куйган Собир бахшидир,
Мен куйганим стар икки жаҳона.


Иттифоко, шу йиғинда Махфират момо ҳам бор
экан. У бахшини танибди. Овозидан-да. Шу кеча у
ўтмишни эслабми, бахшининг ўзисиз кечган ёлғизлигига
раҳми келибми, ишқилиб, тун бўйи йиғлаб чиқибди.

Биз бахши эмасмизки, уларни муродига етказсак...



Қорни бирор марта тўймаган шу Йўк
зарбофт тўн хақида ўйларми сира?
Ва ҳечса мингямоқ жандасини у
тескари киймоқни ўйлаб кўрарми?

1989



БЕЖАВОБ ДУНЁ

Кўзларим сўйлашни ўрганди,
энди зарурмикин менга бу тилим?

* * *

Ўз-ўзига маҳлиё одам
кўзгу денгизига ўлганда чўкиб,
собик хусни йиғларми
унинг жанозасида?

* * *

Тушларимдан чиқарми мен севган аёл?

* * *

Йиғи, сени қандок кулдирай?

* * *

Нега байроқдай хилпирар
бўм-бўш энги собик жангчининг?

1987

ОЙ ҲАҚИДА РИВОЯТ

Бир вақтлар у қуш эди —
хумо.
Бошлар ҳам бор эди у қўнадиган,
бўйин ҳам бор эди — қилғулик тумор.

Бир кун уни тутиб олдилар,
бошчасини узмадилар, йўқ,
кесмадилар у қўнган бошни,
хонумонин бузмадилар, йўқ.

Солмадилар, хатто, қафасга,
ундан тухум сўрамадилар.
Тортмадилар гўштини сўйиб
султон учун тамаддига.

Уни тутиб оёқларидан
патларини чархга тутдилар.
Қушнинг танасидан тирқираб
қонлар оқишини кутдилар.

Қон оқмади. Пўлат патларни
чарх кукундай тўкиб ташлади.
Чархланган хумо
Ойболтадай ярақлай бошлади...

1990



Бизлар узоқ чекиндик олға,
Енгавердик... мағлуб бўлгани.
Енгиб бўлдик, мағлубмиз энди,
Гулиқаҳқаҳ йўқдир кулгани.

Пахта эса, пахта кулмайди,
Маймун эмас йиғлагани у.
Хушомадлар келмас қўлидан,
У — шаҳаншоҳ, бадқовок мангу.

Тишларини вақт қокиб олган
Бадсиёк бир мўйсафиддир шох.
Ўз-ўзидан аёнки, демак,
Тишникимас, кўзники бу оқ.

Ҳеч вақо йўқ пайкалдан бўлак,
Куздан бўлак ҳеч нимарса, оҳ!
Пахта эса юткизиқ учун
Далаларга тикилган байроқ.

Бош ўрнига қўл берди бизга
Ватан манфаати учун худой.
Қўнди хайкалларнинг бошига
Бошимизни топмаган хумой...

1986



Тун кечар, кун кечар,
бу юрак хун кечар,
мунг кечар – гунг кечар.
Ойнинг гуноҳи бор,
ойнинг савоби.

Қароқлар — қароқчи,
нигоҳлар – алдоқчи,
ишқ — хато, ишқ — ҳақчи.
Ойнинг гуноҳи бор,
ойнинг савоби.

Севгани фармондир,
алдандим – армондир,
зормандир, хормандир,
Ойнинг гуноҳи бор,
ойнинг савоби.

Тушларим қонайдир,
ичаман — талх майдир,
мен севган гул кайда?
Ойнинг гуноҳи бор,
ойнинг савоби.

Муҳаббат — айдаҳор,
юрак ер ҳар баҳор,
адодир у нахот?
Ойнинг гуноҳи бор,
ойнинг савоби.

Кўнгил фазосида,
кўнгил қасосида —
кўнгил қазосида
Ойнинг гуноҳи бор,
ойнинг савоби.

1999

• • •

Ёлғизликни кияман.
Ёлғизлик — урфим менинг.

Бироқ уни мен
кўзларни куйдирмоқ учун киймадим.

Ёлғонлар ялтираб турганда,
айниқса,
хушомадлар кийганда ипак,
ёлғизлик — ҳақиқатнинг
ночор кийган одми кўйлаги.

1988



ИЛОНГА ҚАСИДА

Илон —
дунёдаги энг кичик,
узулиги бир қулоч дарё.
Таассуфки, ҳеч ким буни
Гиннес китобига рақам этмаган.

Оқиб кетаётган илон узунлигини
ўзи билан олиб кетар ҳамиша,
йиғиштириб кетар ўзини,
беҳуда чўлларга қараб оқмайди.

«Сиёсий иқтисод»дан
бирор соат сабоқ олмай туриб ҳам
иқтисодни билади илон.

Ифлослантирмайди сувини,
лекин унда чўмилиш хавfli.

Илон ўзанини ўзи белгилар...

Илон — қарлуғоч тилинда
ёзилган бир мисра шеър.
Мен уни ўқий олмадим.

1988



ОНА СОҒИНЧИ

Кўзлари тўрт бўлган онам ёнидан
Томларга югуриб чиқар қизғалдоқ
Менга йўл қарайди уйнинг тоmidан.
Тўрт қиблага туташ йўл. Бари — алдоқ.

Шамоллар юлқийди кўйлаklarини,
У томдан тушолмас менга йўл қараб.
Онамнинг сочида соғинч қарийди,
Хувиллаб ётади менсиз тўрт тараф.

Онам кўзларига қарай олмаган
Томонлар юзига деворни тутар.
Ариқлардан оқиб келган олмалар
Қизчамнинг қўлларин соғиниб кетар.

У ҳали билмайди, дунёда унинг
Қўлларин соғинган олма борлигин.
У ҳали билмайди, қишлоқда кунин
Бувиси йўлига интик, зорлигин.

Тош тушган сувдаги ҳалқоблар каби
Қиблалар қизғалдоқ кўзидан қочар.
Сўфи бўлолмаган тўрғайлар — набий,
Менинг келмасимдан фол, ромлар очар.

Шу фолни ёлғонлар қилмоқлик учун
Қишлоққа талпиниб яшайди кўнглим.
Мен бир кун қайтаман, келарман кўчиб.
Онамга қарашгин, қизғалдоқ синглим.

1991

АХЛОҚНИНГ ПАЙДО БЎЛИШИ

Парвардигор қўлларига яширган
бир нарсани бандасига кўрсатди.
Бу эс эди,
таниди одам.

Ва бошини урмоқлик учун
девор тиклай бошлади.

1988

ДУНЁСИМА

1

Гуноҳлар кун-бакун ўсадир.
Бурғдой ўғирлашдан бошланган гуноҳ
букун Хиросимадир.
Замин гувоҳ, замон гувоҳ...

Гуноҳлар ўсмоқда, ўсмоқда улар.
Оғирлашаётган Заминнинг вазни
энди бир хўкизга оғирлик қилар.
Ўсаётган гуноҳлар вазмин.

Гуноҳлар аёлни пахтага ҳайдар,
Гуноҳлар — пахтанинг тарозибони.
Аёлнинг вақти йўқ. Бизларда Ойдан
бўлак ҳеч ким рақс тушмас «Оразибон»га...

Гуноҳлар ўсмоқда,
ўсмоқда улар.
Улар ҳам дев каби, аждарҳо каби
болаларни еб кун кўрар.
Келажак бурқситиб чекмоқда жабр...

2

Синдиринг минг йиллик таассубларни,
гуноҳларга ҳайкал қўйинг, одамлар,
улар асраб қолар кўпларни
фано сари сўнгги қадамдан.

Тошга айлантинг гуноҳингизни,
тош гуноҳнинг кўзларин ўйинг,
иқтисод қилинг кўзни,
яхшилиқка асраб қўйинг.

Келажакни кўрмасин
гуноҳлар токи,
токи улар омон юрмасин,
имкон топинг,
имкон топинг.

Дунёсима,
 алҳазар, Дунёсима!
Гуноҳларга ҳайкал қўйинг...
Эҳтимол, мен осийман,
аммо ҳаёт қалтис ўйин...

1987

XX АСР ОДАМИ

Тўхтадим.

Кўланка йўлимни тўсар,
Нахотки, бу ўзимнинг соям?
У лаҳзама-лаҳза ўсар,
Дам-бадам катгарар

тун каби ғоят...

Олд — зимистон. Юриб бўлмас.

Хайрона турдим,

Ортга қараб (муздай тер босди танимни),
Қувиб келаётган юракни кўрдим,
Юрак ўзимники эди.

Танидим...

1990





Менинг вазифамга кирмайди шеърга
Тиқилинч шаҳарда уй топиб бермоқ.
Урхо-ур, оломон тўпланган ерга
Кирмасман шеър учун мен қилич сермаб.

Агар халқ олдида, жамоат жойда
У шакл киймаса, менда не гуноҳ?
Тўғри, у оқ эмас, тушмаган Ойдан
Оёқларин узати-иб шундоқ.

Ҳозир замон бошқа, даврлар бошқа,
Ўзи учун ўлади етим.
Майли, бошларини урсин у тошга,
Йўқдир ундан тилим қисқлик ерим.

Унинг бурчин ўтамасман, хулласи калом,
Мана, чўкса, дарё, учса, осмон.
Дорнинг оғочига бермасман салом,
Қўйинг, шеър ўрнига сиз мени османг...

Сўйлаганим — изҳор, баёнот эмас,
Гарчанд дилимдагин айларман баён.
Изҳор шеърларимга хиёнат эмас,
Гарчанд ёзиқларим худога аён.

1990

КУЗ ЁМФИРИ

булут билан ёмғир иккови ҳамкасаба айниқса кузда бироқ ёмғир тўкилмагандай хазонлар ҳам ёғмас ҳеч қачон таҳрирталаб ўхшашлик бор булут билан ёмғир ўртасида шу лаҳзада гужум соясида шеър ёзаётган шоир булут кўланкаси ва йўлбошчилигида йўлга чиққан пайғамбарга ўхшайди жуда лекин шоир кузги ёмғирга ўхшаб баргрезонга тақлид қилмайди ёмғир хазонларнинг ҳолини кўриб мунғайиб олади дафъатан сўнгра баҳордагидай шовуллаб эмас эзилиб эзилиб ёғади шўрлик ким билади дейсиз балки у ҳам суяк сураётгандир яратилажак одам атонинг тупроғига ўттиз тўққиз йил ёққани эсига тушгандир аҳтимол унинг ёмғир шўрлик тушган кузнинг аробасига хазонлар кўшиғини айтмасдан иложи йўқ энди эзилиб шоир чиқмас куз ёмғиридан

1990

ТИНИШ БЕЛГИЛАРИ

нукта тиниш белгисимас сиз ўйлаганча шоир айтганидай ўлим ҳам эмас у арқондир бир учидан кўринаётган таранг тортилган арқон

ундов эса дор устида лангарсиз томоша кўрсатаётган дорбоз у ўзига шу қадар ишонадики мувозанат сақламоқ учун қўлларин ёзмокни эп кўрмас ҳатто

сўроқ белгиси дордан пастга қараётган дорбоз

кўпнукта ҳар куни кийимини алмаштириб киядиган олифта шоирнинг хотини кирларини қуритмоқ учун ёйган учта дор

тире бу тахта бу тахтадан кўнгиш қушига уя ясаб бериш мумкин

иккинукта қоралама дафтар чизиги шеър ёзса бўлади баҳор ҳақда масалан бу чизикларга

вергул тухумини ёриб чиқаётган жўжа

қўштирноқ буюклар қамалган турма деди соқчилари уларга эрк бермас гўё ҳали сиёсий маҳбуснинг қамок муддати тугамагандай

қавс янги чиққан ой ёнбошига қайрилиб юлдузларга қараётган ой

ва ниҳоят нуқтали вергул унинг қиёси йўқдир йўқсил каби фақат вазифаси бор

1989

БАЙРОҚ

кузатаётган аёлнинг қўлидаги рўмол байроқдир висол билан ҳижроннинг чегарасига тикилган байроқ садоқат байроғи лекин висол билан ҳижрон чегарасини бузмок учун бу байроқни йикиш шарт эмас ҳижронзада аёл рўмолини ўпиб йиғлайди юзлар байроқдир илк марта севилган қизнинг юзлари байроқ каби олланар голиб мухаббатнинг байроғи мағлуб мухаббатнинг байроғи кимнинг қўлин ўпсанг ўша қўл байроқ одам ҳам байроқдир бошга кўтармоққа арзиса гар у одам нени ўпса байроқдир ўша бошга кўтаргани демакки байроқ

1989



АӘЖІҒЫ



Мен — минг йил япрофин тўкмаган дарахт,
Мезонга сочаман зардим — заримни.
Минг йил ғаладонда сарғайган варақ
Шимади дилимнинг сиёҳларини.

Юракни толдирди шеърлар хижрони,
Мухтасар умримда узун бир суқун.
Тили кесилган сўз минг йил бу ёни
Дилнинг рафторидан сўзламади — гунг.

Не-не хижрат ўтди, гунохлар ўтди,
Ўтди мен енгилган бадр жанглари.
Ёзмаган шеърларнинг хунлари тутди.

Энди мен баҳормас, хазон истарам.
Қушлар уйғотмаган куз тонгларига
Мен бир шеър истарам, азон истарам.

1995

* * *

Қайда яшамасин одамзод, асли
Сангижумон, Румо ё Тошканд.
Аслида биттадир юракнинг касби:
Юрак эрка ихтисослашган.

1989





Аёлни эсламоқ кўз ёшдай офир,
видодай офирдир уни эсламоқ.
Қўрғошин хаёллар эзади бағрим,
жанда умидларга соламан ямоқ.

Аёлни эсламоқ муқаррарлиги
келгуси кунларга илдиз ёяр, ох,
биноқ бу илдизнинг на дарахти бор,
на-да бир мева бор ва на бир япроқ.

1990

АРМОН

Гул.
Албатта, илоҳий.

Бўй етмаган бўй.

Бўй етмаган ҳар бир нимарса
илоҳий бўлар, шубҳасиз.

1991

ТУНГИ ТИЛАКЛАР

Маҳбубага

Фалакнинг кўзлари менсирар — хунхор,
Мен қаён гизланай, ғам дашти ҳамвор,
Бир кунда паймонам тўлади минг бор,
Бир аёл сипқорар уни кечалар,
Ичганлари нур бўлсин унинг!

Қайтадан оёққа тураман минбаъд,
Бозорга солади бозургон қисмат,
Набийларга талош бўлган мен — уммат,
Бир аёл кунимга яраб нечалар,
Қайғулари кўр бўлсин унинг!

Аёлни йиғлатиб, мени кулдириб,
Қобирғам синдирса момогулдирак,
Кўксимда қарсиллаб очилса юрак,
Унга тортиқ этсам мисли чечаклар,
Кўз ёшлари дур бўлсин унинг!

1991





Бир аёл ишқига бўйинсунган эрк.
Мингта савдоси бор савдогар юрак.
Бахт билан ўртада битта эшик — берк
Ва битта қаноат удумга кўра.

Зарар кўрмаслик учун висолдан
Ҳижрондан тикилган ҳимоя кийим.
Сизни суюнтирадиган мисолдан:
Кўнгил билан куйиб кул бўлган уйим.

Ичилиб бўлган май. Паймона — ярим.
Чеккулик бир алам. Бир ўй — сургулик...
Онажон, куйинма, буларнинг бари
Фожиа эмас, оддий кўргулик!..

1987

* * *

Ишим шу!
Сиз менга халақит берманг —
Гарчанд ўзга хилқат истайдир юрак —
Бутун эл-юрт қараб турганда
Мен ишончни оқлашим керак.

Бир қўлда чўткаю бир қўлда бўёк,
Чопаман райят кўрсатган томон.
Ишончнинг қизарган жойларини мен
Бўёк чаплаб оқартаман.

Ишонч эса ўжар — оқариб турмас,
Оқлаган сари у оёғин тирар.
Шиорлар осифлик матоҳ сингари
Қизаришин қўймайди сира.

Мен ундан қайсарман. Тушун, севгилим,
Кўряпсан, мен бандман, изҳорлар кейин.
Ишқни-ку қўятур, шеърга вақтим йўқ,
Оқлашим шарт.
Бўлақол, кийин...

1987

* * *

Ёшим дарёсида оқётган сандиқ,
Кўзим қирғоғида ғафлатсаро — мен.
Оқиб кетаётган бахтиёр тантиқ —
Сандиққа атайдан ётиб олган сен.

1989



ОҚЛАНГАН ОЛМА

Мирза бўлса теракнинг оти,
Лайли эмас, Мажнун бўлса тол.
Демак, аёл — олма дарахти,
Ўз-ўзидан, демак, у аёл.

Чеки йўқдир ташвишларининг,
Рўзгор деган гаплар бор, ахир.
Илдизлари юмушга унинг
Ботиб кетган.

Бу ҳаёт — тахир.

Аёл банддир. Уни иш ютган,
Вақт йўқ сочин қўймоққа тараб.
У, ҳаттоки, бултурги тутган
Пешбандини ечмабди, қаранг.

1988

БАҲОРНИ ҚАРШИЛАБ

Худди биринчи бор келгандай баҳор,
Энди гуллаётган сингари гуллар,
Дарахтлар шу бугун кийгандай қабо —
Эрк қучгани янглиғ оч, юпун қуллар,

Ҳеч ким қилмагандай ҳали хиёнат,
Рўбарў келгандай ишққа илк бора,
Қулиб боққанидай йиғлоқи омад
Бунчалар энтиқдинг, юрак бечора?

1987



Энди мен кирмасман тушнинг тушига,
Умид мендан умидин узсин.
Оқ қиламан кўнгил қушини
Сўзсиз.

Ҳасратларим ёввойилашар,
Аламларим чекар ўзини.
Юрак зиндонидан таъқиқлар оша
Мен озод этаман «севги» сўзини.

Таранг асаб толаларимни
Созимга тор қилиб тортаман.
Шеър қиламан волаларимни,
Энди муҳаббатдан ортаман.

Олис Ойнинг истарасига
Иситмайман муздай юракни.
Яшираман қобирғалар орасига
Ойга қараб ўсаётган титроқни.

Орзулардан ясай бошлайман армон,
Соғинчлардан — ғариб бир гўша.
Унга бахтни қўймам ҳеч қачон,
Мени сотган хоиндир ўша.

1989



Ушбу кечам, ялдо кечам қорлидир,
Оппоқ кечам, ойдин кечам зорлидир.

Дардим янги, қалбим қадим, ишқ қадим,
Ойлара мен бошим уриб йиғладим.

Севганимнинг бағри, ёху, тошмидур,
Юлдузларим юлдузмидур, ёшмидур?

Севганимнинг бағри агар тош бўлса,
Юлдузларим юлдуз эмас, ёш бўлса,

Дардга чора етолмасман бу кеча,
Мен тонглара етолмасман бу кеча.

1985

ТУНГИ ЮРАК


Юрак кетиб борар,
Кезгинди юрак,
Гоҳида имиллаб, гоҳида қичаб.
Юрагимнинг қадам товушларини
Эшитиб ётаман ҳар тун, ҳар кеча.

Юрак кетиб борар тентиб, телбараб,
Қўнгил кўчасида мендан бесўроқ.
Сени излаб борар Самарқанд томон,
Бечора уйингни билмайди бироқ.

Шўрлик кутишингга ҳамон ишонар,
Мен эсам бор гапни қандоқ айтайин?
Қандоқ тушунтирай унга видони,
Ўзбекча билмаса, ахир, қайтайин?!

Нима деб аврайин, не деб эланай,
Қандоқ қайтарайин бу йўлдан уни?
Юрак кетиб борар...
Начора, менинг
Шу бебош юракка қолгандир куним.

1987





Гулларим қонайди.
Алвон гулларни
менга раво кўрмиш бу тақдир.
Ҳижронрўй қизғалдоқ бўлди юпанчим.
Аёл,
сенинг гулларинг оқдир.

Сўзларим қонайди.
Отилган кушдай
ҳар сўзимдан силқиб ётар қон.
Сўзларнинг ярасин боғлаб яшайман.
Аёл, сенинг сўзларинг омон.

Юрак-чи?
Билмадим, у қайда ҳозир,
қонарми,
ёнарми,
тонарми ишқдан
ва ё севармикин сени у ҳамон,
омон чиқдимикин бултурги қишдан?..

1990



«УШШОҚ»

Куй.
Куй?

Куйдин
куйдим.

Кимни куйлар қадим мусиқор,
надин инграр надим мусиқа?

Куйлар куйди, қўшиқ куйди,
муҳаббатни қўшиб куйди.

Сен куймадинг,
сен суймадинг.

Бўғзимдаги сўзлар шашқатор:
мусибат,
 мусиқа,
 мусиқор.

1990


ТЕЗЛИК ВА ҲАРАКАТ

Тезлик — сув юзалаб чопаётган тош,
ҳаракат тўлқинлар мавжудлигидир.

Денгиз эса...

Осойиш кунлар
эринчок тўлқинлар,
чўкиб ўлган тўлқинлар
мозорига айланар денгиз.

1984





Эримас унинг ҳам бошидаги қор.

Елкасига тирмашар
невараси альпинист каби.

Бутун бошли хонадон
турар унга суяниб...

1990

ЮЛДУЗ

Юлдуз хиёнатни билмас, бокира,
эртага келаман, деб алдамас у.
Юлдуз таманнони билмайди сира.

Келаман, дедими, келар, ишқилиб,
унга тайинламоқ шартмас қайтадан,
фақат у келади келмоғин билиб.

Кўзларни куйдириб юрмас кўчада,
хаёли жувондай боқар жимгина
олис осмонидан соқит кечада.

Бахтиёр аёлдай жилмаяди у.

1985



Орамиз булутли кундайин очик,
нафратлар орага бемалол сивар.
Кирлари қуриган аёлдай меҳр
дор — ишонч риштасин ўртадан йиғар.

Кийиммас — бу дорга илинган матох,
чойшабмас — осилган куннинг қўрига.
Агар у шўр бўлса, бизнинг шўримиз,
агар у оқ бўлса, демак, қуриган.

1987



Кечиргиси келар юракнинг
кимнидир ё бирор гуноҳни.
Букун унинг марҳамати кенг,
сендек, илоҳим.

Лек гуноҳ йўқ. Ҳамма фаришта —
малак янглиғ фикр юргизар.
Илонга ҳам аълоий аршдан
тушган каби меҳр кўргизар.

Балким, улар чиндан малақдир,
хато мендан ўтган, эҳтимол.
Бу ер эмас, балким фалақдир,
балким, қибла, ғарб эмас, шимол.

Кўқдан эмас, ғойибдан келар
ваҳий келса ҳар бир малакка.
Биздан фарқли ўлароқ, улар
Ҳақ амрини қилмас калака.

Ошкор қилиб ўтирмас тангрим
берган ҳар бир фармойишини.
Уюштирмас бунинг-чун ҳеч ким
фаришталар намоийшини.

Шаккок йўқдир. Яна қайтардим.
Оҳ, недандир бу қўнгил тўлмас.
Мен бир оят каби айтардим:
фариштани кечириб бўлмас.

1989

БЕШИНЧИ ДАРВЕШ

Бормай туриб қайтаяпман мен,
қайтаётган садосиз акс.
Самоъ эмас тушаётганим,
зикр эмас, бор-йўғи, рақс*.

Лаблардаги мажруҳ табассум
на қувончдир, на қайтиш шавқи.
У бўйинга элпарварликмас,
замонсозлик осган бир тавқдир.

Қайтаяпман, мазгилим йироқ.
На мен Қайс, на йўллар — биёбон.
Бу йўллар оқ эмас, қайтага
оқ қилинган поёнсиз ёбон.

Қайтаяпман кутган еримга,
мени кутаётган одам... мен.
Мен ва менинг ўртамиздаги
оралиқ йўл пахтазорга тенг.

1989

* Изох: бизда хотирлар дахрий,
бекаму кўст топган тарбия.
Инчунун, хаж фарз эмас, улар
бориб келар фақат харбийга.

ЁЛФИЗ АЁЛ

Орзу қилар бахтиёрликни,
Бахтсизликни истайди жуда.
Бахтсизликни ундан қизғанар
Ундан бахтни кўп кўрган худо.

У йиғлайди, йиғламайди, йўқ,
У кутади, ҳеч кимни кутмас.
Худо бахтни олмайди ундан,
Бахтсизликни эса ер ютмас.

Толе эмас, эрксизлик излар
Тўрт томони қибла бу аёл.
Унинг сарсон-саргардонлигин
Овлоқдан жим кузатар ҳаёт.

Ҳаёт билан унинг иши йўқ,
Қисмат излаб тўрт томон елар.
Мен қилмаган гуноҳлар учун
Ундан узр сўрагим келар.

1989





Вазифаси бор ўлимнинг ҳам,
Бордир унинг мажбурияти.
Шиори бор, бордир байроғи
Ва, шунингдек, жумхурияти.

Вазифага кўра, кунба-кун
Сидқидилдан ўлим яшарар.
У — фуқаро. Бироқ на одам,
На бир ҳайвон ва на ҳашарот.

У замонга терс борар, илло,
Замон унга боқиб тўймайди.
У яшарар — қарийди замон,
Ўлим замон билан ўйнайди.

У яшарар. Мактаб ёшидан
Йил — пўст эмас — ёшлар ташлайди.
Ва беш яшар жужуқ ўлимча
Бир боғчага қатнай бошлайди.

Дев мисоли у бир юмалаб,
Боғчадан ҳам ўтар нарига.
Уни шўрлик оналар суйиб,
Белар бўм-бўш бешикларига...

1986

БАТАНШАРВАРЛИК

Савобларим гуноҳдир менинг,
гуноҳларим, ёзиғим ҳалол.
Ҳар кун намоз ўқиса бўлар
уларнинг устида бемалол.

1989





Бизнинг эътиқодда турмайди бу куш,
Бу куш даҳрий эмас, муслим ҳам эмас.
Бу куш насроний ҳам эмас, шунингдек,
Тақводор ҳиндудай мол гўштин эмас.

Бу куш ватанпарвар эмасдир, илло,
Иссиқ ўлкаларга учиб кетмайди.
Унинг, айтарлик иш қилмаса ҳамки,
Беҳуда сайрашга вақти етмайди.

Бу куш муаллиммас, фан номзадимас,
Бизнинг тилимизни билмайди чунки.
Бироқ шу ҳолича дорилфунунда
Бемалол эрқдан дарс бериши мумкин.

1988



Хокистар хок истар — мусулмон,
Тасаллилар — кулранг тажалли.
Муҳаббат — хур, таҳайюр — филмон,
Ўлим енгиб берар ажални.

Бахт — қайғуни англамоқ учун
Тангри сунган бир аёқ шароб.
Мен уни олмайман, сиз ичинг,
Йиғлаб кўрмаганлар.

Зора...

Юзларимдан оқсоч изтироб
Табассумни сидириб ташлар.
Кўз ёшларим — бир ҳовуч тупроқ,
Ходий каби хижратга бошлар...

Хокистар хок истар, пок истар —
Муҳаббатни — ювиб ололи...
Ҳар кимнинг йўлига бир Ясриб музтар.
Яллама, ёрим, яллола...

1991

БЕВАҚТ КЎЗ ОЧГАН БАҲОДИР

Баҳодир кўз очар дунёга.

Озод қилай деса, Ватан озоддир,
Бахтли қилай деса, миллат — бахтиёр.
Кетмон чопай деса, чўллар ободдир,
Ҳамдард бўлай деса, куйлашар алёр.

Баҳодир кўз очар дунёга.

Давронда қолмабди зарра адолат:
Қаро кунлар энди қайтиб келмайди.
Кўксини тирнайди аччиқ надомат:
Бахтиёр кунларга яраб бўлмайди.

Баҳодир кўз очар дунёга...

1986

ШОИР

Унга на шон керак, на бойлик, на зар.
Зиналаб шеър ёзар.

Бор-йўғи, бори...

Осмон чорласа ҳам унга ер афзал,
Шоир зиналардан чиқмас юқори.

Унинг бир истаги:

(Майли, қай кимса,

Шаънига номақбул сўз айтса, айтсин.)

Кўкдан тушолмаган бирор-бир хумса

Шеърий зиналардан заминга қайтсин.

1991



ТАҚРИЗ

Кўлларида китоб тутиб
ухлаётган одамни кўриб
менинг ҳавасим келар
бекор кетмаётган вақтига унинг.

1986



Эрмак учун чўзилмаган кўл —
Бир ҳовуч бор. Денгиз эса йўк.
Сув ҳам йўқдир шунга яраша.
Ҳовуч қуруқ, ҳовуч қуп-қуруқ.

Агар недир ҳовуч ичинда
«Йилтир» этса, сув эмас, ишон.
Ҳовучларнинг энг кичиги ҳам
Садақага тўлмас ҳеч қачон...

1988

• • •

Шайтон қишки дарахтларнинг япроғи —
қарғаларга ёзар сураларини.

(Дафтар бўм-бўш.)

Қарғаларни ўқий бошлар қахратон
изиллаб.

(Қулоққа айланар деворлар,
чолдеворни оклаб бўлмайди.)

1993

ИККИ ШЕЪР

Саҳарда қон тупурсам, майли...

Усмон Носир

1

Бу саҳар ғунчамнинг бағри қон,
Қон туфларми ғунчам бу саҳар?
Қай нобакор ва ғаюр бир жон
Бу кеч унга юттирган заҳар?

Оғзидаги қон билан кулар
Ғунчам менинг, мағлуб мардгинам.
Ўлса ҳам у шундайин ўлар,
Мағрур ўлар... Жувонмарггинам.

У йиғламас. Тонгнинг сўзига
Ишонманг, у алдоқчи, қувдир.
Шабнам эса ғунча юзига
Фаррош кеча сачратган сувдир.

2

Умр — шам, демишлар. Мукамал қиёс —
Бир бошдан яшайди умрини одам.
Фақат шоир умри, фақатгина у
Иккала томондан ёнаётган шам.

1988

САНГИЖУМОНДА ЁЗ МАНЗАРАЛАРИ

Саратон.
Дармондай қуриган сувлар.
Булоқларнинг кўзлари ўйиқ.

Сувсоқ сойлар илон каби биланглаб
кетиб борар
сувлоқ ерларга.

Бунда чанқамас қудуқлар фақат.

Ёзнинг чанқоғин кўриб,
хижолатдан ерга кириб кетган қудуқлар.

1990



СЕН КЕТГАН ЖОЙДА

Узилиб ётар бир энлик умид,
қасамлардан бўшаган шиша,
сарикқа чалинган виво мавсуми,
йиртиб ташланган андиша.

Муҳаббатнинг пўчоқларин бетиним
фаррош шамол супураб.
Қизармаган кўкнинг бетига
фавворалар тупураб.

Ўриндик, қобирғалари қатор,
гуллар панасига ўрмалаб қочар.
Йўлак беҳуш йиқилиб ётар,
Армон бола очар...

Энди армончаларга келсак,
сайрга олиб чиқар уларни она Армон.
Қушанда бахт қуши, бахт қуши эса
учиб кетган жанубга томон.

1988



ЭРК САБОҒИ

Бўзига тикилган ҳақиқатдан ҳам
одам ўлиши мумкин.

Лекин бу ўлим
мағлубият дегани эмас,
ғалаба ҳам эмас, шунингдек.

У — сабоқ, холос,
эрк сабоғи.

1989



Илҳом Ҳасан хотирасига

Севмаган ҳаётни севар чоғларда
Жоним ханжар каби бўғзимга ботди.
Навбаҳор аталган хазон боғларда,
Не тонг, тонг ўрнига жудолик отди.

Бўғзимга тиқилган ҳаётни минг бор
Кўз ёшдай ичимга ютиб яшадим.
Юрак — мутаассиб, юрак — тақводор,
Дўстлик аталгувчи эътиқод қадим.

Топганим дўст бўлди, дўст — йўқотганим,
Мен уни излаблар қайга борайин?
Надомат ичраги кўзларим — ғаним.

Кўзларни енгурман бир куни, тайин,
Ўлимни эпласа бўлар, биладан,
Лекин мен ҳаётни нима қиламан?!

1991



Бир нимарса рўй бермоқчидай,
Ўнгдан келаётган каби туш,
Тиллари кесилган ҳақчидай
Узо-оқ тин олмоқда Товуш.

Бу таққослар хатодир, балким,
Бу сукутнинг мазмуни ўзга?
Эҳтимол, у бутун бир халқни
Сотмоқ учун шайланар сўзга?!

1988

АДАШГАН БОЛАЛИК

Болалик-да.

Абдумалик иккимиз

Ўйнаб ўт қўйгандик қариган тутга,

Тутанди,

тут ёнди, ёниб кетди тут.

Ўйинни ер ютди,

уни ер ютган

Эди, ҳа!

Тут ёнди, чунки ёнди тут.

Қўркувдан қалпоқда сувлар ташидик

Ўйиннинг ўтини ўчирмоқ учун.

Ўчмади.

Йиғладик.

Биз бола эдик...

Тутанди.

Тут ёнди.

Чор-атроф янди:

Бармоқлар бигизга айланди шу кун.

Қўркиб бигизларнинг санчилмоғидан

Кўзларни қўл билан яширдик нигун...

Барибир, бигизлар болалигимнинг

Жовдироқ кўзларин кўр қилди ёмон.

Сўнг кетдим шаҳарга.

Сўқир болалик

Қишлоқда адашиб қолди нотавон.

1986

НАФРАТ ТАРБИЯСИ

Нафрат бўри эмас, бемалол
Уни қўлга ўргатса бўлар.
Унинг шайтон сиёғин кулок —
Сифатида тугатса бўлар.

Хатто, унинг феъл-атворини
Қилмоқ мумкин одамбашара.
Бунинг учун Буюк Ахлоқни
Чорлаш кифоядир ҳашарга.

Ўргатилган нафрат — беозор,
Зарар кўрмас жамоат мулки.
Ундан, ҳатто, бандаси қолиб,
Фаришталар олишар улги.

Истараси иссиқ нафратнинг —
Бахузур жон куйдириш мумкин.
Шу тарбия эвази, унга
Ёғийларни суйдириш мумкин.

1990



Ниманингдир олдида тош бор,
Нимадир бор тошнинг ортида.
Тошнинг кўзларида ёш бор,
Ёшнинг сирти таранг тортилган.

Ниманингдир олдида ёш бор,
Нимадир бор ёшнинг ортида.
Ёшнинг кўзларида тош бор.
Тошнинг сирти таранг тортилган.

Тош — насиба, ёш — шўрлик қисмат:
Ёш йиғланар, тошлар терилар.
Умр — Ердаги тошни мисқоллаб
Йиғнамоққа кўкдан берилар.

Рух, таранглик — қарғиш, деб айтар,
Майсалардай ям-яшил қарғиш.
Биздан эмас, худодан қайтар,
Қайтар бўлса, мабодо, ҳар иш.

Қарғиш гуноҳларни унутмас,
Айникса, тош терилмаганда.
Тошнинг ўлигини ер ютмас
Унга ўлим берилмагандай.

1992





Эгнимизда бир кўйлак.
Мен ва ҳариф.
Бир дўстлик бизни куйлар,
кўшиқ — ғариб.

Бўйнимизни чирмар бир ёка,
бир кўйлакка сизмай қолдик, асосан.
Илон бўлиб бўғар, бешафқат чақар
қай бир пайғамбарнинг қонсираган асоси?

Эгнимизда бир кўйлак —
алвон-алвон.
Юракдан ташга бўйлар
ёввойи алҳон:

вали шафак, соҳиби қудрат
таёғини дарёга ташлар.
Сув ўрнига қон оқар минбаъд,
томирлар қақрай бошлар.

Қон билан ювади чалажон элат,
гуноҳ эмас, кўйлақларини.
Кўйлақлар қўқармас ювганинг билан,
эқканинг билан-да, барибир...

1985



Келдигим, келмагинг бунчалар қийин?
Кулдигим, кулмагинг бунчалар қийин?
Билдигим, билмагинг бунчалар қийин?
Суйдим, аллаёр-аллаёр,
куйдим, аллаёр-аллаёр!

Бу кўнгил эмранди, азобим — билгич,
висолинг фалаждир, хижронинг — келгич,
табассум кўрмаган шикаста кулгич.
Суйдим, аллаёр-аллаёр,
куйдим, аллаёр-аллаёр!

Бахтнинг дарвозаси занглаб ётади,
юррак очилмоғин ангниб ётади,
ортига ой ботар, юлдуз ботади.
Суйдим, аллаёр-аллаёр,
куйдим, аллаёр-аллаёр!

Не найсон эдингки, абр келмади,
кошинг қаросидан кадр келмади,
на жаҳру на зикру садр келмади.
Суйдим, аллаёр-аллаёр,
куйдим, аллаёр-аллаёр!

Кўнгил ойнасига кўз ёш тўкилди,
фалақдан ой билан куёш тўкилди,
умид косасидан бардош тўкилди.
Суйдим, аллаёр-аллаёр,
куйдим, аллаёр-аллаёр!

Дилдан юлиб олдим хар битта байтни,
кулиндим, тилиндим, алёрлар айтдим,
шояд тунларимга суйдигим қайтса.
Суйдим, аллаёр-аллаёр,
куйдим, аллаёр-аллаёр!

1999

ҲАЙРАТ АЙҒОҚЧИСИ

Мен тошни
ёриб чиқажакман тошёрар каби
тутиб бермоқ учун сизни ҳайратга.

Мен ҳайратнинг айғоқчисиман.

1987

ОМАД

Мийиги бор омаднинг фақат,
Мийиғида кулиб қарайди.
Шу бир қарич, бир энлик кулги
Бирор қаро кунга ярайди...

Мен минг бора айтдим-ку сизга,
Қитиғи йўқ унинг азалдан.
Ўқтин-ўқтин жилмаяр, холос,
Янги турган каби касалдан.

1986



Ўтмиш оғир.

А. Вознесенский

Ўтмишнинг иссиғин ўлчамоқ учун
камлик қилар симоб захиралари.
Юзидан қон қочар, ранг борар ўчиб —
сарғармоқда китоб саҳифалари.

Ўтмиш тилдан қолган.
Дардини эса
ёзиб кўрсатади эски ёзувда.
Биз ўқий олмаймиз. Ўргатгин, десак,
Муаллим харфларни ёзади сувга.

1986



Ун бўлмаса ҳамки уйида
Дехқон элагини сотмайди.
Шикоятлар келмас ўйига,
Бировга арз қилиб ётмайди.

Очлик енгиб, тоқ бўлса тоқат,
Икки дунё тор келса кўзга,
У зорланмас, сўкинмас, факат
Элагини тутар оғизга.

1985



Кўзим, осмонларинг бунчалар қаро,
Нечун сен яралдинг ридоваш тундан?
Сомончи тақдирнинг қанорларидан
Тўкилган юлдузлар адашди унда.

Малаклар адашди, рухлар адашди,
Топиб келганлари: юрак ва армон.
Гарчанд бу кўзларим пешона эмас,
Нечун мен худога, ишончга зорман?

Гулларим адашди мактуб мисоли
Муҳаббат аталган вайроналарда.
Мен хокдан тўраган қақнус қуш каби
Гулдан туғилмоқни истадим хар дам.

Шеърдан туғилмоқни истадим — осий,
Ғиштин сатрларда исён иси бор.
Куйдан туғилмоқни истадим, илло,
Қайдасан, асотир, қайда, мусикор?

Тушларим адашди Самарқанд ёқда,
Гарчанд хар кунжаги кафтимдай аён.
Замонга қарғалдим, суякларимни
Итларнинг олдига ташлади ҳаёт.

Ё мен адашдимми қорачиқларда,
Кўзларим осмонмас, балким, сиёҳдон?
Ё сиёҳ-ла қисматимни манглайга
Ёздимикин ҳурлар тушиб у ёқдан?

1989

РУҲНИНГ КЎЛАНКАСИ

Эшитилар гулларнинг бўйи.

* * *

Юрак пўст ташлайди.

* * *

Юлдузларнинг занги тўкилар.

* * *

Дарахтлар тонгни излаб
кечани кечиб борар.

* * *

Анорлар дард каби ёрилар.

* * *

Тун — зиндон.
Нафақат, онг, зиндон-да ўсар.
Унга султонни
жойлаш мумкин суяги билан.

* * *

Қабоқлар кечмишнинг қирғоқларидир.
Хотиралар тошқини.

* * *

Бу кечани армонлар ичар.

* * *

Баданига ботган тушнинг синиқларидан
у дафъатан уйғониб кетар
ярим кечаси.

* * *

Эрк чойшабмас,
кўйлакдир.

* * *

Осмон ҳам ахён-ахён
тошиб турар қирғоқларидан,
унга ҳам чўкиб кетиш хавфи бор
шоирларнинг пешонасида.

* * *

Шеър тўқийман ўргимчак каби
мухаббатнинг толаларидан...

* * *

Зўрланган гумбазлар ҳомиласига
термулиб бўзлайди бичилган минор.

* * *

Гўрлар қисир — туғишдан қолган...

* * *

Келажакдан
қадам товушлари келмоқда.
Унда кимдир юрганга ўхшайди.
Ялангоёқ эдинг-ку, ўлим?

* * *

Оёқларин осмондан қилиб
ухламади ҳали синчалак.
Демак, собит тепадаги кўк,
демак, ҳали ҳаёт устивор.
Демак, йўқдир алқашга ҳожат
оёғи осмондан келганни.

1980 — 1991

БОЙ ОДАМ

Чумолининг кўзларидаги
Дунёларни сотиб оламан.
Бўзтўрғайнинг бўзларидаги
Хунёларни сотиб оламан.

Майсаларнинг титроқларини
Тонгдан йиғиб оламан бир-бир.
Бобом қабрин тупроқларини
Қовураман қозон қиздириб.

Ловуллатиб пуллар ёқаман
Ўчоқдаги ўтни ўчирмай.
Кенгайтаман энсиз ёқамни
Ҳарифимдан кечиб кечирмай.

Дўстларимни ичаман — шароб,
Ҳар битта дўст заҳардан қиммат.
Дўст нўш этмоқ мен учун шараф,
Маъзур тутсин, хазрати Ум(м)ар.

Бир аёлнинг муҳаббатини
Ўйинқароқ юрак — боламга
Сотиб олиб бераман. Уни
Ўйнаб юрсин ётоқхонамда.

Бир гул каби ўтқизса, майли,
Кўқартирса, майли, тувакда.
Қиморларга ютқизса, майли,
Койиб бўлмас, юрак юрак-да!..

Фаррош туя судрар думини —
Боғ ораста, тоғлар — чиройлик.
Менинг эса қиссамда умр —
Бир мартага берилган ойлик.

1991

ОЙБЕКНИНГ КЎЗЛАРИ

Нигоҳлар ўлмайди, нигоҳлар ҳаёт,
Нигоҳлар руҳ каби ўчмас бир шарор.
Кўзлардан кейинги иккинчи умр
Нигоҳлар умридир... ҳақ этмиш қарор.

Нечук соз нигоҳнинг сарғармаслиги,
Арча яшиллиги унда ҳаётнинг.
Беаёв санчилар игна барглари
Заиф ерларига адабиётнинг.

1986



ИЛОН ЙИЛИДА ЁЗИЛГАН ШЕЪР

Қаҳратон бермади қаҳридан,
бахор кетди гуллари билан.
Ёз — тап-тақир.
Бу йил —
хазина устида ётган илон.

Қорни тўймаётган мамлакат учун
табиат йил — илонни ёпар.
Илон ширмой кулчадир,
қон уни излаб топар.

Тупроқ — ақл.
Ул кароматгўй
безовтадир жонсарақ.
Қонни чақиради хазина,
хазина қонсирар.

Қоннинг nasibаси — бу кемтик кулча,
унда қоннинг тишлар изи бор.
У ҳарбийга кетган ҳозирча,
бирок қайтар кези бор.

Қон қайтади,
унутмас у қасос тотини —
ивитиб ер қотган илонни
сувга ботириб...

Айтгандай,
нечук эди илоннинг ранги?
Оқ эмасми, мабодо?
Кечирсин тангри.

1989



Истилочи харфлар бизга тегмади,
босиб олди кечмиш хаётни.

Тарих — мустамлака
ўтди харфлар тасарруфига.

Таассуфки, тарих
Марксдан олдин ўтган,
кураш йўлларини билмаган шўрлик.

1984



Илдиз ёяр осмонга чақмоқ,
осмон ёрилар.
Ёриқлардан нур тўкилар, оқ,
бу ёғдуда қайга борилар?

Ёмғир эмас, юлдузлар ёқар,
ерлар қўкка қорилар.
Теппамизда илдизлар ёнар,
бу ёғдуда қайга борилар?

Не хижратдан дарак бу ёғду?
Юрак зориллар.
Ким айтади, ким менга, ёху,
бу ёғдуда қайга борилар?

1989

СЎНГИ ОТАШПАРАСТ

Кўйлагингни кийиб олгин, аланга,
Кўйлак тикиб берай бардошларимдан.
Менда Ватан, сенда энгил таланган,
Мен ҳазар сўрайман Аллоҳ каримдан.

Марҳамат ўрнига қасос берсин у,
Иноят ўрнига — ғазаб ва қаҳр.
Мен энди севмасман, нафратим — мангу,
Қисмат — ичилмаган шаробдай тахир.

Кўйлагингни кийиб олгин, аланга,
Ёғийлар қиличин қўлига тутмас,
Букун кўз ёш билан келади душман.

Биламан, сен қадим самандарқушсан,
Хокистар Ватанда очу яланғоч.
Сени нафрат каби юрак унутмас.

1988

МЕТАМОРФОЗА

Осмон шовуллайди денгиз мисоли,
Қармоққа қадалган зулук ҳилпирар.
Бахтни тарғиб этар рисола,
Ўртага қил кирар.

Парилар ўрган отнинг ёлидан
Тўкилган бу қил.
(Мени кутаётган сулук — волидам,
Қайтаман, сабр қил.)

Қилни ўрамадим бармоқларимга..
(Қайтиш иштиёқи тирнар дилимни.)
Осмонга ташладим, қармоқларимга
Қайта илинди...

Қонимни ичирдим сабрга қуйиб,
Зулук бўлди қил.
Мен узоқ яшадим ёшимни қўйиб,
Шу тахлит етмиш уч (бари илон) йил.

Кенгаймади лекин пулсирот,
Қайтанга у кетди узилиб.
Ёллари ўрилган Фирот
Қирқ қизнинг йўлига тикар кўзини...

Қизлар қариб қолган — ўсимлик,
Қўлларида мадор қолмаган.
Тошдан эса, қиёматлик дўстимдан
Йўнибдилар қа-а-атта бир лаган.

Иқлимлар — ўзгарди — обиҳаволар.
Гидамлар учмайди. Тулпор йўли музғалоқ.
Парилар супурги миниб — ҲАВОлар,
Шовқини дунёни бузади — шалоқ...

Осмон шовуллайди денгиз мисоли...

1990

ҚОҚИГУЛ

Ояр Вақитисга

Қоқигул.
Қуёшнинг сингиси, олтинсоч малак.
Заминнинг қишларда тўнган кўксини
илитмоқ учун
қуёшга ҳашарга чиққан гулгинам —
мўъжаз қуёш,
мўъжиза қуёш.

1985



Одамни
қамаб қўйса бўлар бемалол,
сургун қилса бўлар, хаттоки...
ўзига.

1991

ШЕЪРИЯТ

Топпон хоним, шўргинанг курсин,
Юрак шаклин ўзгарта бошлар.
Бурчакланиб борар энди у,
Энди у фишт шаклида яшар.


1991

ИЖТИМОЙ МУЛК ТАРБИЯСИ

Оёқларинг остидаги шу ерни
Ишонма десалар: «Сеники!»
Ким деса хато дер бу дерни,
Хоҳи у Мор бўлсин, хоҳ у Сенека.

Бу ер умумники, инқиллаб,
Тармашмагин унга, ерпараст одам.
Сенга берармиди Инқилоб
Тортиб олганини худодан?

1987



ЧИСТОН

Оёқост шавқ учун осилган бир тавқ —
Топталган эрк учун тўланган товон.
Товон эвазига юм-юмалоқ шавқ
Туяётган тавқпараст авом.

Шавқнинг-да шакли бор замон-маконда,
Мавҳумдан кўра у моддийга яқин:
Сочлари тўкилиб кетган хокандоз
Кулранг камзулига юрар тақи-иибб.

1989



Маъзур тутинг мени , бахтли(к)ман,
Бахтиёрман хаддан ташқари.
Мухожирман ўз юртимда мен,
Тошкент – менинг Кошғарим...

Яна такрор айтаман сизга:

Туркистонлик эмас, бахтли(к)ман,
Турк тарихин севмоқ на хожат?
Керак бўлса, Фахриёр учун
Тарих ўқир бир чўлок мажор.

Мен бахтли(к)ман, пешонам шўр, о!
Парвардигор, ўзинг кечиргил
Мен осийни.
Менинг ёлғиз гуноҳим: вергул!

1987

ГУЛИМ

Юракни тикаман, таваккал бу — мир,
Ютаман, хижронинг чиқади. Не сир?
Қароқда армонлар айланар гир-гир:
Гулим,
рухсорингни кўролмадим бир.

Бошимда қузғундек чарх урар кунлар,
На дер бор, на шеър бор сенингсиз тунлар,
Кўксимдан Ой бўлиб отади мунглар,
Гулим,
рухсорингни кўролмадим бир.

Не ростки, дунёнинг ёлғонлари мўл,
Бермоғи мушкулдир, олганлари мўл,
Не ғамки, кетгандан қолганлари мўл,
Гулим,
рухсорингни кўролмадим бир.

Не баҳор, мен уни соғинмай қўйдим,
Не сабр косаси — хажр, май қуйдим,
Не орзу эдингки, армонга йўйдим,
Гулим,
рухсорингни кўролмадим бир.

Гулларга қарайман, гулим йўқ менинг,
Йўлларга қарайман, йўлим йўқ менинг,
Ёндим-у, қуйдим-у, кулим йўқ менинг,
Гулим,
рухсорингни кўролмадим бир.

Не найки, бўғзида наволар куяр,
Қобирғам ўрнида хаволар куяр,
Оққушнинг бўйнида саволлар куяр,
Гулим,
рухсорингни кўрурманми бир?

1998

НАТЮРМОРТ

Саратон.
Қоқ чилла.

Нафас етмаётган уй
оғзи — деразани каппа очади
дарё қирғовига
чиқиб қолган балиқдай.

Дераза рафида турган гулдон.
Гулдонда этагин кўтариб олиб
чўмилаётган атиргул.

Шаффоф гулдон.

1992



Қайлардасан, менда бир замон
Ўз-ўзини йўқотган аёл?
Хаёт сени излайди мендан,
Тимирскилаб кидирар хаёт.

Қайлардасан? Қадим эхтирос
Юрагимга ташлайди соя.
Хотирамга кирар-у ёдинг
Таъкиблардан излар ҳимоя.

Кўршапалак хаётнинг қора
Қанотлари пайпаслар ёдим.
Мен қочаман, сотилмай қолар
Ватан каби, севгилим, отинг.

Мен бадар қилган исмнинг
Фуқароси бўлмай туриб ҳам
Хаётларга сотмайман уни,
Мусофирликларда юриб ҳам...

1989

ВАРИАЦИЯЛАР

Чор-лов

Капалак қанотлари сўзанадир — гўшанга,
Кел, унда ўлтирайлик,
на-на-най-нум, гуллайлим,
куёш нури сочала — танга.

Бошимиздан сочсин-у кўрар
душманларнинг ҳам меҳри ийсин.
Гувоҳликка ўтсин жўралар,
сўфитўрғай никамиз қийсин.

Кел, лайлим, соғиндим,
ниначилар нинасин тердим йўлдан ўмалиб.
Ўргимчакнинг оёғи
қонамабди, чумоли

жавдарнинг пўстлоғи билан — зарил-да! —
елпийди, ел турар гурсса ва гурсса.
Пардалар харир,
юзингни кўрсам...

Юзинг излаб учиб кетди кўзларим,
соғинчларим бознади.
Ишонмагин чумчуқларнинг сўзига,
пуч ёнғоқлар қўлидаги талокни мен ёзмадим.

Ёзганим шеър бўлди —
ёзганим — чор-лов.
Суйганим бир бўлди,
куйганим — минг-ов.

Кел, гулим, эландим,
кел, лайлим,
бахтли бўл мен билан,
шоирлар айтмоқчи, «висоллар айлаб»...

Кел энди,
кел(ин дей)!..

Ўн икки чораклик рўмол қиламиз
оққушларнинг қанотларини.
Шамолнинг шохига илаамиз
(ерларга судралса) сиймин барингни.

Баринг байроқ бўлар, шубҳасиз,
севгидан енгилган юрак байроғи...

Кел энди,
кел(ин дей)!..

1991

Афсун

Офтоб нури сочала — танга,
Бошимиздан сочар, гул, ясан.
Қапалак қаноти — гўшанга,
Ўртада мухаббат — бир қасам.

Кўйлақлар тикади нилуфар,
Гулларни куйдириб киярсан.
Ёсуманлар сепади ифор,
Ортингдан чечаклар иярар.

Камалак — эгнимда беқасам,
Белбоғимни тугар куртаклар,
Сандувочлар берар уй ясаб.

Сўфитўрғай қияди никоҳ.
Давом этар кўхна эртақлар,
Мажнун бўлган шу толлар гувоҳ.

1996

ТУН ТАХАЙЮЛИ

I

Дарахтлар ухлайди тик турган қўйи,
Майсалар заминга бош қўйиб ухлар.
Фақат балолардан қўриқлаб турар
Ором нималигин билмаган рухлар.

Тоғлар ухлаб ётар туядай чўкиб,
Тунда суянч бўлмас Аллоҳдан ўзга.
Тошлар ухлар, мошлар ухлар, Шош ухлар,
Йиғланажак ёшлар ухлайди кўзда.

Муҳаббат ухлайди, боши қоронғи,
Тишлаган олмаси — Ой занглаб қолган.
Юлдузлар — Сомон йўл чумолилари
Сув ичгани сойга тушади толдан.

Ширин-ширин тушлар кўрар парилар,
Ғунча қилиб тугар муштчаларини.
Оналар тун бўйи қўриқлаб чиқар
Шоирдан уларнинг тушчаларини...

II

кемасини оқизар м
Бир Нух ёши-
чалик хижрон кечар кечаларимда.
Зулмат мени ичар кўзимга солиб,
Ой нур сочар умид чечакларига.

Илонлар оқарар хажр тунида,
ойдинда ётгани — узун хотира,
юракни қўймайди, шўрлик юракни,
сўйлоқ тишларини унга ботирар.

Ровий ҳам ўзимман, кулоқ ҳам ўзим,
тинглайман ўзимнинг чўпчакларимни.
хар бир калимага эргашар кўзим.
Соат занг уради туннинг ярмини...

Изтироб одамнинг тегар жонига,
овутгинг келади ўзинг-ўзингни.
Билган асотирлар жонланар қайта,
сокин бир ваҳима босар юзингни...

Сув ичгинг келади, сувлар сўрайсан,
бахор боғларида қакрайди хаёт.
Сувни белбоғига тугиб олгандир
валилар.
Тушларинг ўнг келар, хайхот!

Белбоғ тугиб кетиб борар валилар,
томчилар томмайди, сув хотин хасис.
Бизни қутқаргани келмайди худо,
хочларга михланиб ётади Масих.

На мен — чобуксувор, на илон — девор,
на менда қамчин бор, на унда қанот.
Валилар ортидан қувиб етолмай
қоламан.
Қўлимда йиртиқ бир қанор...

Сув тугиб келгани белбоғ тикмаган,
мен сени кечирдим, кўзлари чарос.
Кел, энди ёшларим оқизиб кетсин
менсиз тушларингни, қароғимга бос...

1988 – 1998



МАШРАБ

Худолар осмонда яшайди, ахир,
оёқлари тегмайди ерга.
Хаёт, бизга ерни, шу ерни,
уларга еттинчи осмонни берган.

Ердан оёқ узиш бўлса худолик,
заминда юрмаслик бўлса мабодо,
Офоқхожа эмас, осилган «дахрий» —
Девонайи Машраб бўларди худо.

1986

ОЛМОШ

У арвоҳ каби
ташқарида турар ҳаётдан.

Унинг тураржойи
арш билан Заминнинг оралиғидир.

Тортиш кучининг унга дахли йўқ.

Худо билан инсон оралиғида
бир умумий сўз бор «у» деган.

У — унинг исми.

«У»

ҳатто

тош ва ҳайвон учун ҳам
умумий сўздир.

1989



Майли, қаҳрингизни сиз сочаверинг,
Сизнинг шафқатларга бир аҳмоқ йўқ зор.
Баҳор, ёз, куз сизга, қишни-чи беринг,
Менга гулмас, кифоядир совуқ қор.

Қаҳрингиз қаҳратон, азизим, раҳмат,
Барига тайёрман музламоқ учун.
Мени бузилишдан сақлагай минбаъд,
Мабодо, қаҳрингиз кўрсатса кучин.

1985

КЎЗГУ ҚАРШИДА

Тикилиб қарайман кўзларимга,
емирилиб борар қирғоқлари,
юзларим кўзимга чўка бошлайди
тикилиброқ боққаним сари.

Кўтарилар кўзларнинг сатхи...

1984



ҚИШ ЧИЛЛАСИ

Жануб биздан олислаб кетди,
Шимол келди сурилиб яқин.
Қорлар билан сийлади бизни,
Рухимизни кўтарди тагин.

Рухнинг қанотига осилдик,
Шўрлик бизни кўтаролмади.
Далаларда ер чопавериб,
Белларида мадор қолмабди.

Турғизмадик йиқилган рухни,
Қанотига босмадик малҳам...
Пайдо бўлар қайдандир шунда
Қон исини олган бир калхат.

Қанотлари қонга бўялган
Рух қорларда ўрмалар энди.
Катталар қартадан бўшамас,
Болақайлар ўйнайди «Киндер».

Ҳеч кимнинг у билан иши йўқ,
Қирчиллайди далаларда қиш.
Ухлаб ётар боғларда баҳор,
Қор остида ухлайди юмуш.

Гул унмагай, кўкармас гиёҳ
Рухнинг қони тўкилган ердан.
Шу тақирда ундирмоқ учун
Худо бизга пахтани берган.

1985

ТААССУРОТ ИНШОСИ

Таассурот — чуқур.
Чох каби чуқур бир таассурот,
юлдуз кўринади унинг тубидан.

Ёинки
фақат бўйдан иборат
сувга тўлғазилган чуқу-у-у-ррр бир таассурот.
Сузаётган одамга эса
эн керакдир ҳаммадан кўра.

Таассурот ва чох ўртасидаги
тафовут
йўқолиб бормоқда
ривожланаётган социализм шароитида.

Юлдуз санаш учун атайин
йиқилиб тушмайди ҳеч кимса чоҳга.

1988

ЯХШИ ТУШ КЎРГАН ОДАМ

Надомат бўлғайким,
устоз Миртемир,
буюк таржимон
орамизда йўқ.

Йўқса,
тушимни унга
ўнгга таржимага олиб борардим.

1984



Оқартирмоқ учун бошини
яшамайди атай бирор зот.
Тўкмоқ учун сочини асло
кечирмайди олтмиш йил хаёт.

Оқартирса кўнглини атай
мумкиндир у оқартирмоғи.
Тўкса фақат гунохларини
ярашгайдир тўкиб турмоғи.

1981

А Ё Л Ф У

*беш жуфт тахайюл сабоги ва тўрт
танаффусдан иборат*

ой
юзинг доғларига қараб йиғладим
учаётган руҳимнинг
темир қанотларига
тевралар армон
кўз ёшларимдан
қанотлари ивиб қолган мутаассиб юрак
шакарлари тўкилиб кетган
янтоқнинг устида жавраб ўлтирар
ва яширар қанотларини
ичига
эътиқод каби

азонда азон йўқ
хазон бор
муаззин хазон

япроқлар қапишиб қилур ибодат
улар яссавийнинг шогирдларидир
ерга кирмоқ истар
бир йилда пайғамбар ёшини яшаб
бўлган япроқлар
тупроқ бўлмоқ истар
тупроқ тангри осмондан тушган
тупроқ устоз
тупроқ ватан
тупроқ қўйинди
мен эсам
ой
юзинг доғларига қараб йиғладим

* * *

ой
юзинг доғларига қараб йиғладим

кўзгу йўқ
 бешиқ йўқ
 сандиқ бор
ва тоғларни ютиб кетган
тупроқ бор фақат
сандиқ ясриб кетаётган
мухаммаднинг
 қароқчилар талаган
хуржунидай бўм бўш
дарвоқе
 хуржунда ярим тилиқ ой
бор эди
лекин хуржун сандиқ эмас

икки йўл бор мен учун
ё кетурман тоғларга
 узлатгир бўлиб
қуръон ғорига кўнгилли махбус
ё жайхунга оқурман
журжон эса йўқ
ватан эса йўқ

ватан ҳам гоҳида ташлаб кетади
жалолиддин мангубердиннинг
туёқларидан
 ўт чакнаган оти
ёлларига осилиб

учинчи йўл
мен қоламан
 тупроқ қолар
ва томонлар қолар хувиллаб
туркуларда куйланган хунний томонлар
қонга ботиб кетган жануб учун
қўқ кийган машрик
шимол бети қора қарғиш теккан ранг
мағриб эса оқ
ватан кўчиб кетган қайғули тараф

бу йўлда қирғин бор
 узгун бор
она буғи йўқ

унда бешикка беланган
мен қайдаман
унда йўл қайдадир

биринчи

иккинчи

танмахрам йўллар
ё шоҳмашраб ҳарамида
ётганмикин
ипакларга бурканиб

т а н а ф ф у с

шафқат деб аталган қаҳр бор бунда
кўз ёш деб аталган тақир бор бунда
юрак деб аталган сағир бор бунда
йўқдан фақат мухаббат йўқдир

тиллолар туш кўрар кокилингни зар
пешонам тирнайди тақдири азал
хунёгар охида тирилар ғазал
қайлардасан гулим бокирам

булбулнинг тилини қамишга бойлаб
қўксимга ботириб жоним авайлаб
фақат бир сатрни ёзаман ойлаб
гулим менинг тушларимга кир

тахайюл шароби ойдайин заъфар
дилимнинг хижрати қайғуга сафар
алам бор гуноҳ йўқ на хожат ғаффор
йўқ гуноҳга бунча маъфират

қаро тун катида уммедим фалаж
ўйларим ўйилар кўздай на илож
на мен осийдурман на мансур халлож
ўзим қолиб сенга сиғиндим

• • •

ой
юзинг доғларига қараб йиғладим

само бор
самоъ йўқ

зикр йўк
такбир бор
аллох акбар
аллох акбар
хаққа учаётган хабарлар қўналғаси
ой
юрагимнинг мунгроқларини
ингроқларини
қабул қилар ва хаққа йўллар
ўзимга такрор
вахий қилиб қайтармоқ учун
мен вахийни тушимда эмас
фариштанинг қушлар тилида
юралган солган
жазавасидан ҳаммас
мушиқорнинг чумдугидан олмоқ истайман
у қуй бўлсин
сангижумонлик собир бахшининг
дўмбирасидан
бир замонлар яралган қуй
таралган қуй
мен бу қуйни тирилтирмоқ истайман
вақтнинг чексиз даштларида адашиб кетган
қўшиқларни мен шеър қилмоқ истайман
сахройи оханглар билан
токим ундан анқиб турсин
хақиқатнинг ёвсан ислари

* * *

бир жангари арвоҳ кезинар
туркистон узра
қанотлари шомий шамширдан
нигоҳлари қаҳратон
музчил
қасослар исидан бўғриққан ҳавони
унинг чиркиллаши
аркон қилиб эшади
найнинг мунгидай
бўйнига сиртмоқ тополмаётган
миллат учун
топталган ватанда
таланган ватанда ягона эрк
бу

сиртмоқ ҳалқасидан
кўринаётган
музчил осмон
қахратон осмон
у сиртмоқ эмас
арвоҳнинг кўзи
кўзлардан тўкилар кадар маломат
мен излайман суякларимни
самарқандни тимирскилаб чикдим
йўқ
қизалоқ ребеканинг* елкасидаги
қопга кўлларимни тиқиб
пайпаслайман
бегона суяклар
тарсо суяклар
менинг суякларим қани ой
ё бирор ватандошим
сардорларининг
суякларин орқалаб
жангга кетган ҳиндулар каби
савашмоқдами

менинг суякларим қани ой
нечун қобирғамни ўғирлаб олдинг
шайх најмиддин кубронинг
итимисан ё
ёвқур ва учқур
нечун учиб кетдинг фалакка
суякларимни олиб
наҳотки

Алло

менинг қобирғамдан тўраган
султон бўлолмадим жаҳонгир бўлиб
арвоҳнинг кўзлари имлайди мени
ой бўлиб чақирар ўзга бир дунё

* Г. Г. Маркеснинг «Ёлғизликнинг юз йили» асари қахрамони.

т а н а ф ф у с

сенинг тушларингдан панох истадим
узун илон бўлди соғинч бистарим
орзулар кўрғошин армон музтариб
гулим нечун бегона бўлдинг
 девона бўлдим

сочинг дарёсида чўмилар акраб
менинг эса менинг кўлларим қақраб
кўзингда адашган йўлларим қақраб
кўзларимни паймона қилдинг
 гирёна бўлдим

боқиб боқмаганим замоналарга.
бошимни уриб минг остоналарга
мен сени топгандим афсоналардан
нечун қайта афсона бўлдинг
 хайрона бўлдим

* * *

расул ўргимчак
меҳмон ўргимчак
кўйлак тўқиб берибди менга
мендан уялган орзуларимнинг
ипак арқоқларидан
йиллар учиб чиқмоқлиги учун
унинг енги йўқ
ва ёқаси йўқ
 мен ушлаб хайратланмакка
ва ҳаттоки харифим билан
дўст тутинмоққа
ёқа йўқ
инчунун
донишманд бойқуш йўқ
макон тутмоққа
ёқамнинг вайрона чолдеворларин
узлат йўлинда
 бухорий каби

қулоқ бойқуш
камбағал бойқуш

ёқамни сўрайман

ёқам йўқ менинг
ўргимчак тушунмас туркий каломга
ўзича англайди ишораларни
имони ўзича англаган бўлар
гўё мен мукофотсирагандайин
қизил илонни

чамбар қилиб

бўйнимга тақар
на чора
илон сиртмоқ эмас
таассуф
лекин у махлуқ

қайдан хам билсин

менинг бўйнимга
хўжа аҳмад яссавийнинг
вайрона дахмаси

кўпроқ ярашишини

негаки
вайрона ёқага
сиғаверар хар кимнинг боши
вайрона хеч қачон сўраб ўтирмас
менинг мазхабимни
сенинг динингни

* * *

тушларимни қабартирар ой
тушларимнинг қадоқлари
юрагимга ботмоқда

мен қандоқ қуйлайин
қонлар силқиётган юрагим билан
мен қандоқ қуйлайин
юрагимга ой каби
ботиб кетган қадоқларни

оттирмай туриб

қадоқлар отмайди
тонг каби
қадоқлар отиши керак бўлган осмон
ташлаб юборилган қудуққа
қудуқ эса
кўмиб ташланган

қўлимга белкурак ва чўкич олиб
мен қудуқни ковлайман қайта

ва осмоннинг суякларини
териб оладирман битталаб
сенинг кўзларингга кўймоқлик учун
сен қайлардасан
ситамкаш рухимнинг эгнида
идраб кетган
энгилин

бирор марта ямаб бермаган
муҳаббат

мен сени қайлардан излайин
юрагимнинг қадоқларига
малҳам қилиб

босмоқлик учун
қадоқларни оттирмай туриб
кўймоқ учун шахид осмон суякларини
мен сени қайлардан излайин

нафратим
ё ўзинг муҳаббатмисан

т а н а ф ф у с

суйгилим суй гулим суйги лим
юракларим кўзимдан тошар
мени энгиб бормоқда ўлим
сени эса қийнайди яшаш

куймоқ бўлди менинг насибам
бахтиёрлик сенинг қисматинг
бахтми зомин бўлди масиҳам
бахтимизга бахт мусибати


сени излаб тентар хаёлим
икки жахон оворасиман
сенчи ётсан бахтнинг аёли

юракларим кўзимдан тошар
қисмат бўлди кўзлар қароси
қошлар аро айрилиқ яшар


* * *

оҳанглар тиладим фалакдан
муножот учун

наханглар тиладим уммондан
истиғфор учун
ибодат учун
ижобати учун уммедларимнинг
отим **УННУН** бўлди фахриёр қолиб
наханг йўқ
уммон йўқ
оҳанг йўқ

сахро бор
ва унда мен борман
йўқолган бешикка беланган мен
бешик 

сулаймонбалиқнинг узук кўзидай
митти оғзига
сигмоқлик учун
дарёлари қуриётган
осмонлари чириётган
сахрода туриб
эгамдан мўъжиза сўраётган мен
кетгим келар
менинг бу ердан
карвонларга эргашиб
карвон эса кетиб бўлган
кечикдим
мингани улов йўқ

тутгани ялов
шамол қамғоқ мисол бешикни
бир юмалатиб
айлантириб кўяр қайиққа
қайиқ 

қўлларимга қамчи ўрнига
юган ўрнига
узун эшкак тутиб олганман
кимсасиз сахрода барханлар оша
кетиб бўлган карвон ортидан
қайиққа ўтириб эргашаман жим
сузаётган қайиқ охиста
қумга чўкиб борар
лекин мен қўрқмайман
қайтанга
эшкакни қаттиқроқ эша бошлайман

балиқ излаб бораётган мен
холиқ излаб бораётган мен

барханлар қайиқни чайқайди тинсиз
чўкиб бораётган қайиқни

елкамдаги сўфийларнинг чакмонидан
тикиб олган сафархалтамда
карвонлар йўлидан

топиб олганим

бознаб кетган
яримта шак бор
мухаммаднинг хуржунидан тушиб қолган
яримта ой шу эмасмикин
ва унда
кимнингдир тишлар изи бор
тишларингиз бутми

хазрат бистомий

агарки тўкилиб кетган бўлса
хафа бўлмайсиз
мен уларнинг
тушларимга киришига

изн бермайман

бознаб кетган шакни оғзимга
олишим билан

юрагимга ботмаган
сўроқларни қуса бошлайман
наҳотки
балиқ бўлса сахро дегани
наҳотки
қайиқ деганимиз

биз  га таққослаб юрган нимарса

нахангнинг оғзи бўлса
наҳотки
балиқ бўлса сахро дегани
суб қани унда
унда уммон қани
эхтимол уммон
балиқнинг остида қолиб кетгандир
ё балким
курк бўлган наханг

уммонни тагига босиб ётгандир
набий очиб чиқмоқлик учун
лекин хозирча
пайғамбарлик курсилари банд

* * *

бир кеча туш
шернинг тирноғини бўйнига
тумор қилиб таққан
шоҳнинг хотини

тумсо маликага

инчи иқлимдан
зангори олмалар келтириб берди
олмани еди у русумга кўра
сумалакдай эрий бошлади
тош сийналари
юраклари орзикиб кетди
дийдасига ёш келди унинг
ёшларини тушга ичирди
чанқоғини босиб олди
олис йўлдан халлослаб келган
туш
малика кўнглига мунаввар ғамлар
бахтиёрлик қутқусин солди

ой куни етиб
чақирдилар момочи ойни
маликанинг кўзи ёриди
ой кўрсаки малика
шахзода ўрнига бўри туғибди
кўмкўк бўривачча
зангор валиаҳд
иснод юм юм йиғлатган
маликанинг ёстиғини
қуритдилар чиқариб
офтобрўяга

жабборга жон керак бўриваччамас
қаххорга қон керак орзулар эмас

сандиқларни тобут қилдилар
шахзода оқмаган сандиқлар

орзуларин
чумчук замон териб кетган шох

қафасдан учирди толе қушини
тахтга ворис излаб учиб кетди қуш
вилоятларга

етим бўриваччани
ой олди ўз қармоғига
кўршапалаклар
эмиб кетган сийнасини тутди унинг оғзига
сут келмади
юлдузларни териб келди
емади бўривачча

ой нима қилса экан
шоҳ учирган толе қушини
тутиб едирсами ё
улиётган бўриваччага
тутиб берай деса кўршапалакни
тутинган боласи

ой бўрини ютиб юборди

ой
юзинг доғларига қараб йиғладим

т а н а ф ф у с

юрак бағрим хундир мани
кечиб кечиб бий кечани
тушлар келар қон ичгани
гала гала

кўзларимга йўллар тўлар
рўмол силккан қўллар тўлар
қонаб ётган гуллар тўлар
хамон хамон

ойлар кечар бадр йўқдир
қийр тунлар қадр йўқдир
юзларимда сабр йўқдир
сомон сомон

энди бундан жўнар бўлдим
пешонамга кўнар бўлдим
мухаббатдан тинар бўлдим
ёмон ёмон

сенга қирмас тоғ тиладим
ужмоҳлардан боғ тиладим
ой юзидан доғ тиладим

ОМОН ОМОН
ОМОН ОМОН

* * *

ойлар чўқар фалакдан жимир жимир жимирлаб
тоғлар чўқар фалакка ғимир ғимир ғимирлаб
тошлар қилар калака қикир қикир қикирлаб
менинг эса бўғзимда
улув бордир бир улим
ҳей тулугим ҳей тулум
ҳей тулугим ҳей тулум

тушларимнинг зулфунин бузиб кетди фалаклар
увларимнинг мавжида сузиб кетди фалаклар
армон қолиб умидни узиб кетди фалаклар
менинг эса бўғзимда
улув қолди бир улим
ҳей тулугим ҳей тулум
ҳей тулугим ҳей тулум

кўктангрининг боғида гуллар унар нопармон
энди мен бу гулларни излаб қайдан топарман
синган умидларимнинг дарвозасин ёпарман
гулни излаб борадир
улувларим ул улим
ҳей тулугим ҳей тулум
ҳей тулугим ҳей тулум

осмон чўкиб борадир қароланар қароғим
кўктангрининг боғида унган гулнинг япроғин
қайси шамол учирди тарихлардан сўроғим
тарихларнинг бўйнида
қолиб кетгайми кўлим
ҳей тулугим ҳей тулум
ҳей тулугим ҳей тулум

гул япроғи остида қолган ер сув қайдасан
битта туркни минг кўйга солган ер сув қайдасан
кўпиклардан ибтидо олган ер сув қайдасан

сахроларда адашди
ер сувга борар йўлим
хей тулугим хей тулум
хей тулугим хей тулум

қобирғалар қабарар суякларим кадокдир
қабоқларим ўқ тугаб бўшаб қолган садокдир
куйиб куйиб кул бўлган нафратларим адоқдир
чучмомалар кўк кийган
намозшомгул гул гулим
хей тулугим хей тулум
хей тулугим хей тулум

тулук бордир остида чўкаётган осмоннинг
зулук бордир остида чўкаётган осмоннинг
куллук бордир остида чўкаётган осмоннинг
кўктангрининг қошига
етолмай қолган йўлим
хей тулугим хей тулум
хей тулугим хей тулум

* * *

ой
юзинг доғларига қараб йиғладим

бу йиғи
вужудимга сизмаган сизим

йиғимни йиғаман
сизим сиқталар
йиғимни йиғлайман
оғриқ нуқталар
тош эмас
соғинчга дўнар

бу соғинч нафратдир
қўллардаги кишани билан
кулаётган қулга нисбатан

бу соғинч нафратдир
эртакдан чиқиб
юртни сотаётган қулга нисбатан

нафратни куйлашга бир соз ахтариб
телбарайман туркистон ичра

арвох узра
мен ичра

созлар шевасида мухаббат мадхи
кишанлар жаранги бахтни куйлайди
мен эсам

нафратни куйга соламан
излаб тополмаганим

аёлғу олиб

чалолмаганим

чанқовуз чолиб

чанқовузнинг бўғзидан

куйлар қаталаб чиқар

биюв биюв биюв биюв

биюв биюв биюв биюв

кўк бўрилар жўр бўлар

аёлғунинг сасига

куйларнинг энг ичида

ханжар ёвга қасида

ойга қараб увлаган

ой боласи бўрининг

кўзига ойбалиқлар

сиртмоқ бўлиб кўринар

сиртмоқ эса ой бўлар

бўриларнинг онаси

ой

юзинг доғларига қараб йиғладим

**ўқилиши шарт бўлмаган
иловалар**

аёлғунинг сиртмоқ
кўзига ойбалиқлар
сиртмоқ бўлиб кўринар
сиртмоқ эса ой бўлар
бўриларнинг онаси

* * *

ой
арши аълонинг
фаромуш фаришталар
ёпмай кетган туйнуги

* * *

ой
юзинг доғларига қараб йиғладим

кутаётган фарзандинг менми
эрта бир кун туғилсам
отимни не қўурсан
машраб дебми
ё хоразмшоҳдай
о т с и з бўлурманми мен

* * *

деҳқоннинг хотини
ҳомиладор ой
ўроқ туғади
сукунат эса
кўзи ёриётган ой қичқириғи

* * *

ой
тирноқ
аёл
зорлик

* * *

қарсак шохнинг мулозими
саройда яшар

* * *

ой пўстлари арчилиб
занглаб қолган зангори олма

* * *

тун кимнинг бахтики бунчалар қаро

* * *

эрк
дунёдаги энг жафокаш сўз



* * *

ой
болта

* * *

юрак мени кечирар бошдан

* * *

мен
ой нурида турган рухимнинг
ерга тушган кўланкасиман

* * *

тонг ўрнига қайғулар отар
кимни

* * *

келажакни яшаб бўлдим мен

* * *

рухим сочларингнинг фариштасидир
сени қарғамадим

* * *

сен мақолнинг югурдагисан

* * *

нега эри хиёнат қилган
бу аёл
узук халқасидан нари томонга
ўтиб кетмайди
ва у томондан
бармоғини тикиб қўймайди
қайтиб ўша мараз эрини
кўрмаслик учун

чунки унинг болалари бор
узук халқасига
сигмайдиган болалари

нега у узукдан бунчалар кўрқар
бўғзидан бармогин тундада олмас

ахир бўғзи бўлган билан
унинг тили йўқ
барибир
айтолмас эрига
севмаслигини

* * *

ойузук

* * *

нарсалар
масалан узук
ўзининг моҳиятини
сўраб ўтирмайди биздан ҳеч қачон

* * *

сочимни сўзларнинг чангига белаб

* * *

менинг тўртта хотиним бордир
тўртовининг оти ҳам қибла

* * *

менга дўст керакмас душмандан бошқа
мухаббат керакмас нафратдан бошқа

* * *

ажин туша бошлар кўзгу юзига

*Тошкент — Сангижумон — Тошкент,
1990 — 1991*

* * *

Сочинг зулматига қўлим тушмади,
кўзинг қаросига йўлим тушмади,
қошинг ханжаридан зулм тушмади,
оқ гулим,
 қизил гулим,
 вайрона бўлди дилим.

Ох чекдим, охларим фалакка етди,
Кўл чўздим, қўлларим малакка етди,
Мен юлдуз истадим, қайларга кетди,
оқ гулим,
 қизил гулим,
 хайрона бўлди дилим.

Кун ботди, ой ботди, юлдуз ботмади,
тонг отди, севгимиз тонги отмади,
ойдинда на Ой, на Зухро ётмади,
оқ гулим,
 қизил гулим,
 девона бўлди дилим.

«Кўзим гирдобиди селлар айланур», *
бўғзимда сўз қуяр, қалам найланур,
гул дедим, исмингга жоним бойланур,
оқ гулим,
 қизил гулим,
 мастона бўлди дилим.

Яна не бўлмоқни истадинг, дилим,
Ой десам, юлдуз деб қистадинг, дилим,
нелар қилдинг мендай музтаринг, дилим,
оқ гулим,
 қизил гулим,
 паймона бўлди дилим.

1999

* Вокиф сатри.

* * *

Бўғзимдан сиркирар товуш — қон,
гул — менинг энг сўнгги сўзимдир.
Ибтидо, интиҳо овушган,
муҳаббат сен берган тўзимдир.

Мен уни қадайман кўксимга,
юрагим товондир — ёрилар.
Сен мени севмагин, ўксима,
тошбағир бўлади парилар.

Мен сени гуноҳкор этмасман,
суярман; куярман, бошимга
етар ишқ, мен сенга етмасман.

Юрагим товондир — тўлайман
ойлигим, бойлигим — лошимни.
Кўзимни сўзимга улайман.

1998



Айтаринг не эди, қайтаринг
не бўлди? Билмадим, гулбадан.
Маконинг қай тоғлардан нари?
Излаб кетмиш юрагим бадар.

Бўм-бўш эрур байтул-хазаним,
на юрак, на кўнгил ётмайдир.
Сенсизлик не ҳариф, не ғаним,
на ёнмас, на сувга ботмайдир?

Қайтаринг не бўлди, гулўзор,
қайтмаслигинг не бўлди тагин?
Кўнгил озар, кўнгилда озор.

Кулнинг дарди гулнинг дардидир,
ҳасратларим ётади ёғиб
соғинч боғларининг зардига.

1999



РУХУНАТ

ҲАДИК

Эртага, эртага, эртага
видо тушар, ўртага видо.
Алвидо, гул, кўнгил эртаги,
ўзинг сабр бер, собир худо.

Пешонага кўнмайди кўнгил,
гарчи энди видо айтадир,
гарчи энди умидлар сўнди,
гарчи энди сендан қайтадир.

Сочинг дарёсида юлмаган
гуноҳларим кечирмас эгам,
гарчи ҳеч кас мендек севмаган

ва мен каби қуймаган. Нега
эртага, эртага, эртага
видо тушар, видо ўртага?

1988—1998



«Имло луғати»дай ёлғизлик,
аруз каби бир рустамлака.
Қишки дарахт каби холсизлик,
шеърсизликдай тақир мамлакат.

Нигоҳингдай сассиз бир товуш,
нафрат каби замҳарир чилла.
Модерн қофиядай ковуши
пойма-пой ва йиртиқ бир миллат.

Мангуликдай адоқсиз сабр,
карвон каби иярувчан феъл,
хуш сингари алоқ-чалоқ туш.

Ғоя каби ўтирик таъбир,
бахтсиз каби саодатли эл,
озод каби тутқун битта қуш.

1987



Тийрамоҳ боғлари рутубатлидир,
кезинар, эзинар телба рухунат.
Ёмғир бўлиб бўзлар сағир сукунат,
ичингда ўрмалар куйгин бир гидир.

Гулим, баҳорларда кетдинг сен қолиб,
орамизда тўқсон, бир қишлик йўл бор,
тароқдан ўрмону ойнадан кўл бор,
на охим етгайдир, на қийлу қолим,

Тушовин узолмас вақт — арғумок,
чилтаннинг қўллари қанотга дўнар.
Кетарман, бу ерда колмоғим гумон.

Кетарман, изимдан хазонлар хайдаб,
шамоллар эргашар. Дарахтлар тўнар.
«Бор-хо, кел-хо, хамалам-ха, йўл қайда?..»

1999





Сен мени алдайсан туш каби,
баҳорлар келади, келмассан.
Жанублардан қайтган қуш каби
менинг кулбам қаён, билмассан.

Юлдуздан сўрайман — девона,
мен сени ойлардан сўрайман.
Куядирман шамсиз парвона,
самандардек кулдан тўрайман.

Сен мени алдайсан, гулгина,
кимнинг боғларига қайтарсан?
Кўнглим синар, муз бўлиб синар.

Сен мени алдама, алдама,
суйдим деб кимларга айтарман?
Умид соғинч идроғин ямар.

1999



Зулхумор кечалар ой сийнасида
юракнинг ризқи бор, севиб кутади,
тунлар сийнасидан истар насиба,
осмон булутлардан лачак тутади.

Осмон қизғанади, бермас ойини,
мен эсам тунларга юракни бердим.
Ишқ бўлди, ой бўлди унинг қойими.
Умид боғларидан маломат тердим.

Энди у не кунга, тунларга қолди?
Сифиниб суяди, куяр соғиниб.
Суйдирмоқ бўлдим-у, куйдириб олдим.

Қияр nasibasin қисмат қайчиси,
Ой кусуф бўлади фалак тоқида.
Гул — наргис тунларда куйган Ой иси.

1999



Юрагимнинг қадоқларин кўзларимга суртдим мен,
дил дардларим тупроқ бўлди, тўлмас кўзим косаси.
Муҳаббатнинг алдоқларин кўзларимга суртдим мен,
сенсираган соғинчларни алдаб юрдим асосан.

Сунбул-сунбул соч бўйидан хотиралар маст бўлса,
мен орзулар куюгини димоғимда туярман.
Келганларинг ёлғон сенинг, кетганларинг рост бўлса,
бу дунёнинг ёлғон қолиб, ростларига куярман.

Суюнтирар сени, қийнар мени ҳижрон висоли,
кузги япроқлар мисоли умид тўзиб борадир,
муҳаббатжўй ҳисларимда ғамларнинг истилоси.

Ғарибим ишқ, менинг каби сенинг ҳам кўнглинг ярим,
не ёзибдир азал тақдир, манглаймиз ародир.
Кўзларимиз қаро бўлди, қаро бўлди сўзларим...

1990

* * *

Мен сени тушларга бой бериб кўйдим,
адашдим мухаббат ўрмонларида.
Гоҳо суйдим сени, гоҳида тўйдим,
лек умид милтиллар кўнгил қаърида.

Орзулар сарғариб армон бўлади,
кўнгил ҳам кўнади гул озорига.
Ҳажр паймонаси Ойдаи тўлади,
видо бор, адо бор жон бозорида.

Жонимни бозорга солади дунё,
мен сени севаман сендан айрилиб,
кўзимда жолаю бўғзимда хунё.

Гуллар ўтиб борар, баҳор қутарар,
соғинчнинг қаноти синар қайрилиб,
шўрлик қанотини судраб кўтарар.

1999





Сен ўтмадинг, сендан дунёлар ўтди,
гуррос-гуррос, қадам-бақадам.
Бу кузак, бу тупроқ хазонлар ютди,
юррак — айрилиқлар ўтказган маъдан...

Дунёлар тўпири кўксимни тутди,
мудҳиш бир суқунат — увушар бадан.
Сени қузатмадим, бунчалар кутдим,
келмоғинг қийиндир, кетмоқ — дафъатан.

Кўзларим тўлқини тобора саркаш,
юррак чўкиб борар, енгадир ситам,
ўнгимдан нафармон сароблар тарқар.

Қароқлардан силқийди жоним,
тилда бир иштибоҳ, иста, истама:
хаёт — мусибатлар чекмоқ имкони.

1996



Кечирмади мени изтироб,
мен ўтмадим унинг бошидан.
Денгиз каби жимирлар шароб —
муҳаббатнинг тахир ёшидан.

Ичолмадим мен уни — осий,
ичганларнинг бари гуноҳкор.
Бўғзимни куйдирган бир осим
жоним тўзиб борадир — абгор.

Юрак чайқалади ложарам —
тўфонларда қолган бир қайик.
Осмон — зангор, осмон — ложувард...

Лимиллайди хасрат бодаси
қўзим қосасида, найлайн.
Муҳаббатим — кўр саодатим.

1996

БУҲРОН

На суйгу, на куйгу, на туйгу, на дард,
на кадар нақадар мени суймайди.
На куз бу, на рўз бу, на сўз бу, на зард,
юрагим қовжирар, илло куймайди.

Тушларим бўм-бўшдир кузги ин мисол,
жонларимга тегиб кетди менинг бахт,
бадларимга уриб кетди бу висол...
Синар кўзларимда тўниб қолган вақт.

Бахтни кечирмайди, биламан, юрак,
қилса, дуойибад қилади, суймас
ва қарғар шеър бўлмай қолган сўзларни.

Қарғалган сўзларнинг мунглиғ кўзлари
мендан шеър сўрайди, жавдираб турар.
Юрак қовжирайди валекин куймас.

1985



Бостириб келади қадам-бақадам
япроқлар мисоли заъфар ғалаён.
Кузнинг кўзларида кахрабо кадар,
кузнинг юрагида мағлуб хаяжон.

Орзулар қалъаси бедош ҳамлага,
айрилиқ — муқаррар. Армон — мустажоб.
Таслим бўлаётган буюк мамлакат —
юрагим чирпанар. Қайдасан, нажот?

Нажот йўқ. Фақат бор азоб-уқубат —
ўкинчим, юкинчим, парвардигорим,
ўтинчим: бер менинг руҳимга қувват.

Уқубат нажотни келмас ияртиб,
руҳимнинг кўзлари интиқ, нигорон.
Юракнинг қисмати мағлубиятдир.

1988




Бахор келар далаларга тўркунлаб,*
кушлар ҳам қайтади олис-яқиндан.
Қишки уйқусидан уйғонар миллат,
замбуруғлар бола кўрар чақиндан.

Даралар гумбурлар — қахқах урар гул —
боғларни уйғотар момогулдирак.
Далалар кўк кияр — аёз қолар тул,
куёшни қитиқлаб майса кулдиарар.

Жилғалар дарёга олиб энади
бахор дарагини — бойчечак айтган!
Қиш захри тошларга тегиб синади.

Кўксингни ёради ғам куртаклари,
ёниб ёзгинг келар жигархун байтлар,
юракни алдайди ишқ эртаклари.

1999



* *Тўркунлаш* — бошқа уйга тушган келиннинг илк марта ота уйига меҳмон бўлиб бориши. — *Мухаррир*.

• • •

Ойлоқ кеча, мухаббат кечар,
мендан кечар, ундан кечмасман.
Ой нурлардан кийимлик бичар —
о, бу хижрон, токай ечмасман?

Сенга бахтлар тилайман, малак,
малика бўларсан бахт эниб.
Дев бўларман мен бир юмалаб
ва ўғирлаб кетарман сени.

Тушларимга қамаб қўярман,
тополмагай лўлилар фоли.
«Жоним»лаб, «гулим»лаб суярман...

Овлоқ кеча, юлдуз живири,
хаёлингни кетади олиб.
Қолмоқ — мушкул, кетмоқлик — ирим.

1999



* * *

Не суворий эдимки, лайло,
зулфинг Зарафшонин кечмадим.
Вовайло, вовайло, вовайло,
кўнгил бир гул истайдир — надим.

Раъномисан, мойчечакмисан,
япрофингда фоллар очгали.
Бугунгимсан ва кечагимсан,
суйганим ва суймаган хали.

Дардим айтдим, тошлар ёрилди,
осмонни синдирди гулдирак.
Мухаббат кўнгилни не қилди?

Мунғиб куяр фалакда хилол,
тарс ёрилар кўксимда юрак.
Тар очилар гуллар. Не илож?

1999





Санамжон, кўзларим ўйилди,
хажринг шаробидан тўйдим.
Наволар қуйилди бир хазин,
яғир куйди, бағирлар куйди.

Сени шамоллардан сўрмадим,
бахорлардан сўрмадим атай.
Умид даштларида кўрмадим,
қай боғларни тутмишсан ватан?

Кўнгил сочинг каби қорадир,
қайлардасан, кўзлари қамбар,
қошингга қай йўлдан борадир?

Бир кун мени ишқ хароб этар,
лек очунда ўзга не ғам бор?
Кўз етмаса, сўзларим етар.

1999



Ой юзидан юзиб ўтар турналар,
юрак симиллайди тутқин ва мазлум.
Гуллар ҳам ўтади бағрим тирналаб,
алвидо, гул, баҳорлигим, ёзлигим.

Юлдузлар чўғ каби тортиб борар кул,
булутлар келади гала ва гала.
Бир ёр истар, бир зор истайди кўнгил,
вой, аламжон, жон алам.

Мен рўё истадим, ҳажрни берди,
баҳор истаганим куз бўлди алхол,
кадрлар истадим, фажрни берди.

Ой кўнгил кўзидир, алвидо, гулим, —
шашкатор турналар сирқирар ундан.
Силкинолмай титрайди қўлим.

1999



Осмон яратганнинг мовий кўзидир,
кўзидан яратди борликни худо.
Тоғ ҳам, боғ ҳам, зоғ ҳам унинг сўзидир,
сўзидан яратди борликни худо.

Ёмғирлар сим-симлаб ерларга сингди,
ёшидан яратди борликни худо.
Чақмоқлар чақилди, тошлари синди,
тошидан яратди борликни худо.

Кўнгилга доғ берди, дийдаларга — ёш.
Куймоққа дил берди, севмоққа — аёл.
Чўкмоққа тиз берди, эгмоқ учун — бош.

Жон берди аёлга этгудай нисор,
уни деб ёнмоққа — шам каби ҳаёт.
Берилмай қолгани биргина висол.

1999



Дарахтлар жанубдан келмоқда қайтиб,
қуёш қайтиб келар тонгласи шарқдан.
Шамол бўлиб қайтар хотирлар — дайди,
майса бўлиб қайтар хар битта марқад.

Баҳорга қайтади кўнгил ҳам, дард ҳам,
булоқлар кўзида тинади осмон.
Умид оғриқларга босади малҳам,
боғларга гул бўлиб қайтар Ёсуман.

Адирларга чиқар қизғалдоқ бўлиб
мен севган аёлнинг жонталаш ёди,
Гуликахқаҳ қайтар, берсин йўлини.

Хар неки, баҳорга қайтади, мохим,
гул қайтар, сой қайтар. Ой қайтмас, дод-эй!
Фалакка қадалар юлдуз нигоҳим.

1999

ҲАЛИ

Ҳали куймаган дил, куйланмаган дард.
Йиғланмаган йиғи, кўрилмаган туш.
Ҳали севилмаган бир гул — суманбар.
Маломат кўрмаган ялангоёқ рушд.

Бир ёзиқ — ҳали-да қўл урилмаган.
Юзига ҳали доғ тушмаган хилол.
Оғизларга тутилмаган бир лаган.
Ҳали тангрилар хол қилмаган Билол.

Ҳали сен ҳақингда сўзланмаган сўз.
Ҳали тўқилмаган ғийбат ва фасод.
Ҳали кафанликка бичилмаган сўз.

Битилмаган шеърлар. Сўнмаган умид.
Бир кўнгил — бозори бўлмаган касод.
Бир кўз — ололмаган ҳали мен юмиб.

1999



Куйганинг мен бўлдим, суймаганинг — мен.
Армонлар юракка тош бўлиб чўкди.
Зил тортиб боради кўз ёш каби менг,
сангижумон тортиб боради кўксим.

Хиссиз бўсаларнинг муз қирралари
тош бўлиб, ёш бўлиб тирнар ёдимни.
Мухаббат қарийди, эхтирос арир,
хотирлар бахтиёр этмишдир кимни?

Бу залил кўнгилнинг не залолати:
суйгани сен бўлдинг, гулларга қасам!
Не тонгки, манглайда ишқ маломати?

Дилимнинг барига қўлим етмайди,
не васл — масалдир, не сабр — масал,
мухаббатнинг жарохати битмайди.

1999



Тақдир пешонангни тушларга солди,
рухингни синдирди шўриш аёни.
Сен, тадбир қаёндир, билолмай қолдинг,
қисматинг қаёндир, исмат — қаёнинг?

Сопол синивидай тинжирар* хаёт,
билмон, ёқларинг не, недир хоҳларинг?
Елкангга бош қўйиб хўрсинар аёл,
бўғзингга қўчади гул титроқлари.

На мақсад? На ҳақсан? Юрагинг оқсар,
тушларинг бостириб келади ўнгга.
Қўнгил, сен қаёнсан, қўнгил, қай ёқсан?

Юрак куяр, қўнмас на ўнг, на тушга,
гарчи умидларнинг шарори сўнган,
гарчи армон тифи қадалар тўшга.

1999

* *Тинжирамоқ* — муайян буюм парчаланишининг шевада аталиши. — *Муҳаррир*.

НАМОЗШОМГУЛ

I

Мен сени овутмоқ истадим,
сочларингни силаб, эркалаб.
Намозшомгул, мунглим, музтариб,
хар сахар, хар сафар эр талаб.

Артгим келди кўз ёшларингни,
хам бошинга елкамни тутдим.
Хилол каби тим қошларингнинг
қоқ бағримга ботмоғин кутдим.

Кўнгил чўмди оқар ёшинга,
қошларинг бағримга ботмади.
Тошлари ботдими бошинга?

Гулим, сени қай видо енгди?
Қай жудолик дилда ётмади?
Қай муҳаббат азанга тенгдир?



II

Тораяди қурбим фазоси,
толдиради сабримни ғуссанг.
Бу не мотам, ишқ қазосими,
Не рангларга бўлдинг мустаҳиқ?

Қайси чаманларнинг гулисан,
севилмаган, топмаган қадр?
Кимга мухаббатнинг қулисан,
ғаминг надир, аламинг надир?

Қурбим фазосида ёлғизун
юрак от суради — шахсувор,
изтиробнинг йўллари узун.

Етолмайман ёнингда туриб,
малхамим йўқ дардинга — увол,
ололмайман бахордан қўриб.

III

Кўклам келди эгнингни кўклаб,
Мен бир ғофил, севинч туйибман.
Дил дол этган ўмганни тиклаб,
қайғунг қувончларга йўйибман.

Кимга аза очмишсан, гулим,
менга кўнглинг очмассан нечун?
Сочларингни излайди қўлим
ёшинг дарёсини кечиб.

Суйгим келди сени жонимдан,
исмсиз туйғулар дафъатан
олди чок-чок гирибонимдан.

Ситамларинг келди аритгим...
Юрагимни сенга атадим.
Бу тун соғинчларим қаритди.

IV

Чаппароста айланар замин:
айни баҳор кўнгил хазони.
Зохирига кўчади замир,
эгнингда бир қайғу азоби.

Чувалади оёқларингга
баҳор эмас, нафармон фасл.
Суйган саринг, куйган сарингга
айроликлар «этади насиб».

Юрак япроқларин тўкадир,
тўкадир кўзлардан ёш қилиб,
умид осмонлари чўкадир.

Илинчсиз илинждан толасан.
Бир кун келар, нафратинг тўлиб,
сен севгидан қасос оласан.

V


Не тонг, баҳор изми куздадир,
сахарларинг шомларга дўнар.
Кемтиклашиб боради бадр,
кўнгил тақдир мисоли синар.

Илтижолар этдим намозшом:
тангрим, баҳор бундай келмасин.
Жабринг бўлса, бўлса интиқом,
менга бўлсин, гулга бўлмасин.

Гул кўнглаги кўнгил шомидир,
титраюрман мискин, ғамбода
сенсизликнинг аждар комида.

Сипқорурман сўнгсиз ҳасратим,
бир ўтинчим бўлмайди адо:
сени баҳорлардан асрасин!

1999





Мажрух юрагимнинг кунжакларига
нур бўлиб энади бахмал овозинг.
Куй қанот боғлайди руҳнинг паридан
намхуш кечаларнинг зил хавосига.

Фуссалар тарқайди гул атри бўлиб,
юлдуз бўлиб тарқар қўрғошин ғамлар.
Мен энди ўлмайман, нобарҳақ ўлим,
Гўрўғлидай юлдуз чакнаган дамлар.

Зирқираб сингийди суякларимга
унут эхтироснинг зангли унлари.
Дилбарим, яна шу хотир зарилми?

Оғинар, соғинар, ёғинар юрак,
овозингда эрир кимсиз тунларим,
бахтсизликка кўра, бахтимга кўра.

1999



Муҳаббат — кўксингга қамалган хаво,
чикиб кетолмайди кабутар бўлиб.
Менинг вужудимда ямалган юрак
зангли хасратларга ётади тўлиб.

Сен кимни севарсан ҳаволар билан
жаннат равзасидан энмаган бир гул?
Мен сенга ёмғирлар бўлиб эландим,
юлдуздай пойингга сачради кўнгул.

Ужмох боғларидан учмас кабутар,
мен бир кул, кўкларга тикилиб толдим.
Давронлар ўтади, карвонлар ўтар.

Карвон кўнғироғи хажринг жомидир,
не мортув эдики, юракни чолди?
Муҳаббат хаётнинг интиқомидир.

1999



Мен ҳам севган эдим куйгин ва далли
азобларнинг темир исканжасида.
Юракда минг битта жароҳат, яллиғ,
видо, айролиқнинг тагин қанчаси.

Мен ҳам севган эдим мунғиб, эмраниб,
кўз эмас, кўнгилнинг ёшлари билан.
Ёшлар қор қилмади, муҳаббат — ғаним,
кўнгилни синдирди тошлари билан.

Ойналари синган дераза — кўнгил,
унда на кулнинг, на гулнинг акси бор.
Тиндингми, кўз ёшим, сўндингми, эй дил?

Муҳаббат қайтади, бу кўнгил қайтмас.
Парчин ойналарда ажал рақси бор.
Ўйнайди. У — тилсиз. Келдим, деб айтмас.

1999

КАЙФИЯТ ХУЛОСАСИЗЛИГИ

Бу тунни ичади аёлнинг ёди,
тушлар ижараси тугамас минбаъд.
Бу не узлуксизлик? Яланг хавотир.
Манглай — михлар билан тирналган бир хат.

Тун мени сипқорар майхўр ва дилтанг,
ёлғизлик аталган яра битмайди.
Тунда қолиб кетар юрак мўлтиллаб,
хеч ким тушларига олиб кетмайди.

Умидлар ахтарар Сомон йўлини,
телбарар тунларнинг зулматин ёриб,
Ой — хажр юракда борар тўлиниб.

На гул бор синграрга отини айтиб,
на кул бор бошингга сочмоққа зорли,
на йўл бор бош олиб кетарга дайдиб.

1999

ХАЁЛ

Деразадан ёпирилиб киради шамол —
уй ютоқиб олади нафас
дамқисма чол каби.

Шамол кўзгуга бориб урилар,
чайқатиб юборар сатҳини.
Тўфон турар кўзгу сатҳида.

Лойқалана бошлайди кўзгу.
Лойқалар сачрайди уй деворига,
ерга оқиб тушади лойқа,
пардаларга сачрайди бетин.

Кўзгуга қараб
сочларини тараётган аёлнинг
хаммаёғи шалаббо бўлар.

1999

ҚУШЛАР САВОДХОНЛИГИ

1

Мана бу қуш — мусича.
Ўқимаган. Кўрсавод.
Қўй оғзидан олган чўпин ҳам
бозорда сотолмай юрган нотавон,
камбағал.

Сайисхона бўғотида унинг уяси.
Инга сиғмас темирқанот чақалари.
Оила режаси нелигин
билмаган бир қуш.

2

Буниси — қалдирғоч.
Саводи ҳам бор хижжаларли.
Уясини мактаб шифтига қурган.
Жуғрофия ўқиган, бироқ
билмайди жанубдан ўзга томонни.

3

Буниси — майна.
Бир замонлар комсомол бўлган.
Немискуш ҳам дейди бировлар.

Тили йўқ.

Унинг тилин кесиб қаттол замона
маддох шоирларга пишириб берган
мустабидни макташи учун.

Нима билишини айтолмас бояқиш.
хозир пенсияда.

Бойўғли эса
отаси сотган

чолдеворлар пулига

Хорижда ўқиб келган.

Отаси энди унга

тунни хатлаб берган.

Бойкуш — тунлар султони.

Бироқ тунда ишланмайди. Савод керакмас.

Шунинг учун ҳам

унинг нима билишини тусмоллаш қийин.

1999



Келиндинг, келмадинг,
билиндинг, билмадинг,
ёрижон.

Не севги? – гунохдир,
тун окдир, кун окдир,
ёрижон.

Бахорлар ўртади,
ишқ сарсон ўртада,
ёрижон.

Қўл айри, йўл айри,
хайр энди, гулхайри —
ёрижон.

Мен сени кечирдим,
юракни ўчирдим,
ёрижон.

1999

ИСТИҚЛОЛ

Не устихон, дарёга солдинг?
На балиқ, на холиқ билмади:
Сен ким эдинг минг йиллар олдин,
Қайдан келдинг, қайдан келмадинг?

Келмаганинг ростдир, эхтимол,
Келганларинг ростмидир тагин?
У не ўтмиш, у қайси шимол?
Бу не бугун, яйраган бағир?

У не кеча, саид суяклар
Қўмир каби қораймиш бирдан?
Бу не бугун, массагет, саклар
Ўмганини қўтарар ердан?

У не кеча, устухонлари
Камон каби букилган миллат?
Бу не бугун, хур бўлган сари
Суякларин ювади йиллаб?

Хар бир хожа, хар бир саиднинг
Қора суяклари оқарар.
Бугун кимнинг ийди – хайити?
Суяк чайқаб олар таҳорат?

Тушларини терс қилиб кияр,
Армонларин олар ўнгариб.
Энди сенмас, ўзини суяр
Кечаги хар мазлум ва ғариб.

Мозий томон умр қарийди,
Ёшаради келажак сари.
Мустабидга меҳр арийди,
Нафрат бўлар азмойишлари.

Не устихон, дарёга солдинг.
На балиқ, на холиқ билмади:
Сен ким эдинг минг йиллар олдин,
Қайдан келдинг, қайдан келмадинг?

1999

МУЧАЛ ЁШИ

(қушлар тилида)

I

Теппангда увиллар қисмат бўрони.
Тегрангда айланар номаълумликлар.
На истак аёндир, на мақсад аён,
на кимни излаганинг
ва на изламаганинг.

Аро йўл.

Бу йўлнинг адашишлари
ва ўзинг кўрмаган, билмаган
нарсалар ҳақида ўйлаш азоби,
шунингдек, улар ҳақда билмаганларинг
ва билганларинг
тасаввур ғалвирига
солиб эламоқ,
қолганларин эса
юрак қонинг билан ювмоқ
машаққатин енгиб яшамоқ
мушкуллиги қийнар сени аниқсизликдай.
Қаён бормоқликнинг аниқсизлиги
валекин
қайгадир юрмоқлик заруратидан
гирён одам изтиробларин
узлуксизлиги
вақт каби тинимсиз
пешонангнинг ажин — ариқларидан
оқиб ўтар ингроқ бўлиб, инчкироқ бўлиб.

Вақт оғриғи.

Фоялар бошини уриб ёрган вақт.
Кўзлари кўр унинг, кетар йўлни кўролмас,
қулоғи қар унинг, эшитолмайди
йўл кўрсатиб бақираётган даҳоларнинг
қичқирғини.

қайга ўтишини билолмай ҳалак
вақт бечора.

Вақт ўрмалар,
тинимсиз бўғади,
қайгадир судрар
англамсизликдан
бўғриқиб, ичиккан ҳиссиётингни.

Аро йўл.
Вақти
ўтмаётган одам изтиробларин,
иккиланишларин сувга ташлайди
туш каби.
Сувга оқмас иккиланишлар,
изтироблар оқиб кетмайди сира,
этар юракни ёлмалаб.

Йўл билмаган одам,
адашган одам
эркин бўлолмас
кишанлардан халос бўлиб ҳам.
Қаён қўймоғини билмаса эркни,
тадбирнинг ...корлиги ...сизга айланса,
истифода этмоқ ўрнига
...сизлаб ўтирсанг уни тақдирдай,
эминлигинг қаён қолгайдир,
қолмагай қаён?

Ҳар қандай қушнинг
ихтиёран қафасга кириш
эрки бор,
тузоққа тушмоқлик имкони бордир.
Бу имконни қўлламаслик мажбурияти
унинг эркинлигин таъмин этар аслида.

Шу мажбурият адашмоқ имконидан
фориф тутар инсонни.
Адашмоқ истаги йўқдир инсонда,
лекин ҳаққи бор.
Шу ҳақда — бирор йўл танлаш имкони,
шу ҳақда — бахт ҳамда бахтсизлик,
 гуноҳ ва савоб,
 васл ва ҳижронлар потенциали,
шу ҳақда келажак маънилари бор,

шу ҳақда — келажак маънисизлиги,
шу ҳақда ўлим бор,
шу ҳақда — ҳаёт,
шу ҳақда йўлинг бор, йўлсизлигинг бор,
шу ҳақда — мақсаддан сўнгги йўлсизлик,
шу ҳақда — йўлсизликдан сўнгги бир мақсад,
шу ҳақда — умид ва яшаш малоли,
шу ҳақда — муҳаббат, муҳаббатсизлик,
шу ҳақда — адашиш ҳидоятлари,
шу ҳақда — ҳидоят адашишлари.

Умид раҳмон тавсиясидир,
ким тўғри йўл топса, адашар,
адашганлар топиб олар йўлини,
тадбир эркин бўғар тақдирнинг сиртмоқлари.
Шайтон ҳам ўзингсан, раҳмон ҳам ўзинг,
умидсиз — шайтонсан, умидли — раҳмон.
Пешонанг тирнайди азоб ханжари,
(тангрига айланар азобинг, аросатинг)
ёзиғу савоблар ёзади
пешонангга ажинлар билан.
Ажр аросатдир
жазо — аросат.

Таянч нуқтаси йўқ аросатингнинг,
мақсад вазнсизлиги бор,
умид қадрсизлиги.

Умидларни еб битирган қадрсизланиш,
кўнгилнинг ярми,
юракнинг чорак қисми
колмиш қадрсизликдан.

Моҳиятни емириб борар
сўзларнинг бу қадар беқадрлиги.
Кеча дунёларни яратган сўз
бугун бозорларда ўтмайди.
Кеча солих амалларга бошлаган калом
бугун адаштирар фикрсизлик ўрмонларида.
Кеча суйдирган сўз
бугун куйдирар.
Кеча мағзи бутун бўлган ақида
бугун ўлиб кетган тошбақанинг
косасидай бўм-бўш ётибди.
Кечаги алқашлар

бугунги қарғиш.
Кечаги умидлар
бугунги армон,
армон — қадрсизланган умид.

Кеча...
бугун...

Эртан нима бўлар?
Нима бўлмайди?

Кеча ва эртанинг оралигида
судралади банги, ногирон
вақт,
қаён бормоғини билмайдиган вақт
бемадор.

II

Бир нидо келади ўтмиш қаъридан,
рухингни тинчитмас, азоблар берар.
Тушларингга кириб чиқади
бир акс, лек акссиз нидо.
...Ўрмалайсан ўрларга қараб тинимсиз,
хар куни, хар кеча,
хориб уйғонасан, чарчатар тушлар.
Рухингни тинчитмас ўзинг билмаган,
нотаниш, номаълум ҳисларнинг
бесўроқ тушингга киравериши.
Қочасан,
қочасан, қутулолмайсан.
Уйғонсанг, эртаси яна келади.
Не азоб?
Не гуноҳ қилдинг, худойим,
қилмадинг, эвоҳ?
Нечун ўрмалатар ёвкур битга куч,
кимнинг ё ниманинг иродаси,
ё ушалмай қолган армони,
ёки аро йўлнинг мақсадсизлиги?
Кимнинг арвохидир мени қийнаган,
қай бир ўтган қишлоқдошим арвоҳини
чирқиратдим мен
мусофирликда.
Нечун қўйиб юбормайди ноаниқликлар?

Тушларимни йўёлмас ҳеч ким,
қушлар тушунмайди таъбирни,
таъбирчи малоиклар мазҳаб талашар,
таъбир билан, тақбир билан иши йўқдир
уларнинг.

Рух чайқалар шайин мисоли,
гоҳ хавотир оғир келар,
гоҳи — умидлар.
Мувозанат йўқ.
Хавотир — мушаккал бўлмаган умид,
ярим умидсизлик — хавотир.
У ярадай очиқ,
башоратгүй тушлардай аччиқ,
Унинг руҳингни кесиб
ўтган дамани
тушларинг ўнг
келганидан сўнг
сезасан.

Хавотиринг кўнгилдай очиқ
киргучи аниқсизлик, маълумсизликка.

Кун келар, алоқ-чалок тушларни
кечмиш муайянлиги
билан хатлар кунларингга
тақдири азал.
Пешонангга тирналгани
қувонч бўлиб, кўзёш бўлиб тўкилар.
Кунларингни тортиб олар вақт,
вақт бермайди ёпишган нарсасини,
ўзи билан олиб кетади
Ва сени кечаги кунингга,
қўймайди сира.
Вақт хижрати,
мухожирлиги.

Фақат йўйилмаган тушлар хавотири
кечаларда қолиб кетмайди.
Сен билан бирга ўтар
янги кунларга.
Сен қилмаган гуноҳларнинг масъулияти
сингари таъқиб этар.
Гарданга оласан маломатларни,
дунёнинг бор гуноҳларин, иштибоҳларин

анжуман хилватида
накшбандчи бўлиб – маломатпарвар.
Бу гарданда Савур бахшининг
ёзиб олинмаган дostonлари хуни бор.
Бу гарданда — ўнг келган тушларнинг
айролиқлари.
Бу гарданда —
гуноҳлар учун
тавба-тазаррулар мажбурияти,
килинмаган гуноҳлар учун бир ўкинч.
Бу гарданда номаълумлик хавотири бор.
Йўлсизлик бор,
келажакни тополмаётган,
вахиманинг кўзларини ёполмаётган
йўлсизлик.
Келажак эса душман каби устингга
кўққисдан бостириб келади.
Қай тарафдан келишини билмайсан.
Гоҳ қишлоқдан келар телеграмм бўлиб,
гоҳ таътил бўлиб келар сен олмайдиган,
гоҳ мактабга чиқадиган қизчангга
кийим олиш зарурати бўлиб келади,
бозорга судрайди келажак.
Гоҳо тўланмаган электр ҳақи бўлиб,
чироғингни ўчиради у...
Гоҳо...
Гоҳо...
Келар, келаверар, тинмай келади,
келмаслиги эса ўлимдир.
Тушлар синаб кўрар
номаълумлик хавотирин олдиндан.
Дариғо, ўтмишнинг акс нидолари
келажакдан келар.
Чунки бугун ва келажак ўртасидаги
синирлар очикдир
кеча ва бугундан фарқли ўларок.

III

Кечмиш вақт дарёсига отилган тошдир,
чўкиб ётар собит, мустаҳкам
юрак тубидаги оғриқлар каби.
Уни ўзгартириб бўлмайди,
шиша ортидаги
кўргазма ашёсидай

ташланар кўзга
гоҳ живирлаб,
гоҳи турғун,
гоҳи чайқалиб,
халқоблар орасидан
элас ва элас.

Кечмиш уйғонади
қишки уйқусидан турган илондай
йўлсизликнинг муқаррар хавфидан
хидоят бўлиб,
ҳимоят бўлиб.

Йўл топиб беради адашиш ҳаққи,
йиқилмоқ имкони бошлар солих йўлларга.

Ҳидоят қай йўлдир, адашмоқ қаён?
Кимнинг улоқишин хидоят дейсан?

Аслида хидоят –
набийларнинг адашишлари.
Сенинг адашишинг нимадир
валиларнинг адашиши олдида?
Сен қаён борурсан муриди бўлиб
ўзи йўлни тополмай,
дунёнинг бор гуноҳларини
бўйнига олган
пири муршидларнинг ортидан?
Қайси йўлга кирсанг хатодир,
кирмаслик – куфр.
Тарих – хатоларнинг,
гуноҳларнинг
солномасидир.

Вақт адашди сенинг имконларингда,
йўл адашди – юрмай қўйдинг сен.
Кўнгил даштларида кўйдирги нола
йўл излаб ўртайди хонумонингни.
Меҳмонларин қузатган бекадайин вақт
йиғиштириб кетган йўл – поёндозни
оёқлар остидан
ва ёки
йўллар сўқмоқ каби
қор остида қолиб кетгандир.
хали баҳор узок.
Баҳор ва кечмишнинг оралиғида
саргардон кезади бир саросима –

Йўлсизлик
боласини йўқотиб қўйган
она каби безовта, ҳайрон.

Йўл азоби қийнаса кимнидир,
йўлсизлик азоби чийратар сени.

IV

Мучаллар устингга ёғилар
халқалар бўлиб
остинма-устин,
вужудингни кўмиб боради.

Халқалар айланар,
чамбарак ичида қолган олмахон —
танинг йўл тополмай қийналар,
айланар чамбарак ичида гирён.

Чамбарак гулчамбар бўлмайди.
Йўлсизлик, одатда, гулчамбар эмас,
сийланади хидоят билан.

Чамбарак — даврнинг мақсадсизлиги,
чамбарак — қайгадир кета билмаслик
ва кела билмаслик ўзинг кутмаган
тарафлардан қўққис, дафъатан
ўзинг турган жойга қайтадан
ихтиёран ўзингни излаб.

Лекин аслида
мучал халқалари қайтариб келар сени
бир куни яна
турган жойингга
сочинг оқартириб, юзинг салқитиб.

Турган жойга қайтмоқлик учун
йўлга чиқмоқ маънисизлиги
кадрсизлантирар мақсадларингни.

Уч мучал — уч халқа,
Темур яловига туташми тақдир?
Тадбир туташмидир
ўтмишнинг гуноҳу савобларига?
Келажак ўтмишга қайтади
шу халқалардан.
Шу халқалардан
ўтмиш келажакка ўтиб боради.

Халқалар рухининг Сомон йўлидир,
вақт сомон ўрнига
хаётингни тўкиб халқалар
ясайди ундан.

Рух Темурнинг байроғи каби
ёки сунъий йўлдош сингари
халқаларни қамрар бус-бутун.
Фақат
юракдаги зилзилалар муттасиллиги
халқаларга етказди дарз.
Рухни қабул қила олмайди
дарз кетган жойлар,
айниқса,
янги бир халқанинг уламалари.
Айнан шу йўлсизлик ва аниқсизлик,
умидсизлик шу уламадир.

Шу улама жойлардан
рух кўчар химоя қопламасидай
– таносух.

Рухинг – андухинг,
қай бир ўтмишдошингнинг
вужудида гуноҳга ботмиш?
Кимнинг гуноҳлари эвази
қийналади жон
ҳаросатли аросатларда?
Ўрта ёшнинг танглиги ва йўлсизликлари
бошингда ғажирлар бўлиб айланар.
Сен қочиб кетолмайсан,
оёғингга ёпишиб қолгандир замин,
тўнтариб қўйилган бошингга осмон,
рух қамролмай қолар халқаларингни.

Бу қийноқлар
кимнинг вужудига қайтар бир куни
кўчган рух билан
фароғат бўлиб?

Ким у ўша, пешонасида
сенинг йўлсизлигинг эвази
олис келажакларда
йўллар кўплигидан қийналгувчи зот?

Не йўлни танламоқ эрки у,
қаён юрмоғингни билолмай турсанг?
Йўл тополмай қақшар интилиш.
Умтилиш қақшайди севги армони бўлиб.

Асли иккиси ҳам бир нимарсадир:
умидсизлик умиди,
умид умидсизлиги
бордир халқаларнинг дарз еган жойларида.

Устма-уст қўйилган халқалар
гирдоб бўлиб
юксакларга ўрлаб боради,
куйган кўнгил,
куйган умид,
куйган мақсад тутунларини
ўзи билан олиб кетади
шу юксакларга.

Хар бир учган юлдуз унга тушади.
Юлдузлар мозори — бу кўнгил.

Энди бу кўнгил —
пушти куйиб кетган бир мозор
гўрғули — мақсад
туға олмай қийналар.

Халқаларнинг учи бўлмаганидай
кийноқларнинг хулосаси бўлмайди,
бордир фақат давомийлиги,
узлуксизлиги,
дарзларни ҳисобга олмаганинда.

V

Гуноҳинг — халқанинг дарз кетган жойи.
Кўнгилнинг кўзини очмоққа
ва тазарруъ этмоқ учун эл қатори
гуноҳ керак сенга даставвал.
Сен билан бирга
қариётган оқсоч дунёда
ўзгалар гуноҳи учун тавбалар
этмоқ балосидан асрар бир куни
ўз гуноҳларинг.
Қолаверса, ҳаёт ўз савобларин
ўлчар сенинг гуноҳинг билан.

Сенинг гуноҳингдан келади Махшар,
Аллоҳ иродаси.
Сенинг гуноҳларинг қилар ижобат
пайғамбарлар башоратини.

Гуноҳларинг ювасан
ва осиб қўясан байроқчалардай
қуритмоқ учун дорга,
малаклар йўлини топиб олгайдир
байроқчаларга қараб.

Сени олиб кетар гуноҳлар
сандиқда ё Нух кемасида
қаю тараф, қаю бир ёқлар
йўлсизликнинг ваҳимасидан?

Бир гуноҳки, гулни севарлик,
гулсиз пешонангда, найларсан?
Бир гуноҳки, зеру забарлик,
юлдуз бўлиб сачрар ойлардан.

Гуноҳларинг радди балодир,
кўмир дилда ғамрез хидоят,
гоҳ ўтга, гоҳ сувга соладир.

Сандиқда оқурсан Журжонга
йўлсизликдан излаб ҳимоят.
Гулнинг ишқи ўтади қонга.

Бир йўқлов унади хавотирлардан,
тусмоллай бошлайсан аниқсизликни,
пайпаслаб кўрасан қайтадан.
Йўл эмас,
армонга бир таскин келади.

VI

Мозийга отландинг. Йўллар берк.
Кетар йўлни замонлар ёпди.
Юрагингда таҳқир отлиқ чер,
Замонларнинг ортидан чопдинг.

Эландинг, беландинг ёшинга,
Ёш ўрнига йиғладинг қонлар.
Муножотлар этгандинг кимга
Ижобати бўлди ёлғонлар?

Савур бахши дўмбирасин сен
Наволарин сўрдинг фалақдан.
Нағмаларин сўрдинг атайин,
Жавоб йўқ на ҳақ, на малақдан.

Вақт қайтариб бермас қарзини,
Достонларин сўрдинг, бермади.
Кимларга айтарсан арзингни
Бировлар ғамимни ерми деб?

Йитиб кетди вақт даштларида
Сен истаган қуралай оҳанг.
Сен излаган наволар барин
Замон чайнаб ташламиш, аттанг!

Гуллар қайтар, қайтмайди наво,
Қайтиб келмас қувваи хофиз.
Кунни қайтиб беради ховар,
Лекин қайтмас на достон, на сўз.

Кетиб борар умр қарвони,
Йўл ахтариб, жомини чолиб.
Кўксингда бир қўшиқ армони
Умидлардан келади ғолиб.

Ғояларга талана қарвон,
Вақт талайди уни бешафқат.
Не кўргулик ва не бу карма,
Рух ўлмайди, куй йитмиш фақат?

Харосатга тўла кечмишдан
Сен савоб – бир сулук ахтардинг.
Савоб йўли узук бир ришта –
Қуя еб ташлаган. Хатарли.

Оҳанглар хокини изладинг,
Изладинг сўзларнинг хокини.
Тополмай инградинг, бўзладинг
Сангижумон – тошга топиниб.

Тош жуссаси ерга кўмилган
Ботирнинг бошидай чайқалар.
Кўзлари бир дамга юмилган,
Гирдини қопламиш лойқалар.

Бахшининг овози, эҳтимол,
Тош сиртига қолгандир сингиб?
Арвохидир балки шамоллар,
Қирларни чайқайди – бир денгиз.

Чайқалади тош – Сангжумон,
Унинг уйғоқ сўзидир балки,
Тоғ бошини ўраган туман
Қайтаётган куйдир — у чалган?

Эҳтимолки, Махмуд Намозни
Бахши қилиб бермишдир хаёт?
Бахши қўлдан туширган созни
Қўлларига олмишдир наҳот?

У чалади, чертим уйғонар,
У куйлайди, айтим келади.
Сўзлар куяр, оҳанглар ёнар,
Савур бахши қайтиб келади.

Савур бахши қайтмас, қайтади,
Ким ё нима бўлиб, бўлмайин.
Махмуд бўлиб дoston айтади,
Айта олмас. Келар келмайин...

VII

На келмоқ тайини
ва на келмаслик аниқлиги.
Бир пайтнинг ўзида келиш-келмаслик
бирлиги қийнар сени.
Куз фол очар баргрэзон билан,
дарахт япроқларин юлади
бир-бир ва ерга ташлар:

к	к	к	к
е	е	е	е
л	л	л	л
а	м	а	м
д	а	д	а
и	й	и	й
.	д	.	д
.	и	.	и
.	.	.	.
.	.	.	.

Ойлар ўтар,
эхтирослар совийди кўнгил каби,
турғунлашиб боради фикр:
мақсад оқлар воситаларни,
жараён хар нарсани оқлар.

Сесканиб кетасан дафъатан
миянгга урган бу фикрдан.
Юрагингни совуқ бўлиб уради фикр.

Япроқ бўлиб тўкилар
совуқ урган юрак қўққисдан
ўзининг гуноҳу савоби билан
умид дарахтларин остига.

Юрак – япроқ.

Шамол ейди кузги япроқлар,
дарахтлар шамолдан тўйиб олади,
далалардан сой бўйлари,
изғиринлар урмайдиган хилват жойларга
қайтаётган дарахтлар.
Мезон шамоли.

Мезон шамоли
сув юзига ажин туширар –
куз билан кўшилиб қарийди дунё,
хазонларга кўшилиб,
мезон шамолида учиб юради
қаён бормоғидан беҳабар
ва сувга тушар.
Сувга тушган хазонлар
ҳалқоблар ясайди халқа ва халқа.
Дарахт ёшига тенг халқалар,
тўнкага менгзайди сувнинг юзаси.
Кенгайиб боради халқалар қирғоқлар томон
ва тиниб қолар.
Сув эса
тиниб қолган халқоблар устидан
хазонларни оқизиб кетар
узоқ-узоқларга.

На халқа, на мучал етиб боради
оқим измига тушган
хазон ортидан.

Елканларни хайдайди мезон,
хазон — мамот қайиғи юзар
халқалар қуршовидан ташқарида
эмин ва эркин.

На мақсад, на эрк ва на ғоя билан
иши бор унинг,
умр яшалиб бўлган.

Мезон шамоллари турсалар эсиб,
нам тортиб кетмаса сувнинг қаърига,
хазон узоқ-узоқларга сузиб кетади.

Унда на мазмун керак ҳаётга,
унда на бахт ёки бахтсизлик,
на шаклини топган умидлар,
на мазмунин топган армонлар,
на манзил аёнлиги,
на хидоят қаёнлиги,
на йўл ва на йўлсизлик,
на ихтиёр, на ихтиёрсизлик,
на қўнгил, на қўнгилсизлик бор.

Оқим.

Йўлсизлик йўли бу,
қўнгил қўнгилсизлиги,
маълумликнинг номаълумлиги,
номаълумлик маълумлигидир...

Мезон мувозанати
ва шамолнинг бир текислиги
хазонни чўктириб юбормас.
Ҳалқалар — мучалнинг гирдоблари
ортда қолиб кетган тушқун кимсанинг
некбинлиги каби олис ва олис.
Олдинда оқим бор,
ён-верда оқим.
Оқим тўхтамайди бир зумга.
Оқим абадийдир, мезон — ўткинчи.
Шамоли ҳам қолиб кетар қузак далаларида
хазон қувиб, тупроқларга беланиб.

Қолгани эса
мезонда туғилган шоирнинг
иккиланишлари, кечинмалари...

1999

МУҲАББАТДАН СЎНГ

Армон – жўнатилмай қолган кўхна хат,
Ҳеч ким ўқимаган, суртмаган кўзга.
Юракда сарф бўлмай қолган муҳаббат
Зард ва ажин бўлиб тепчийди юзга.

Йиртиб ташланмаган, ғижимланмаган
Армонни ҳижжалар дил оғриқлари.
На «нима»ланмаган, на «ким»ланмаган
Соғинчларинг тошга айланар... қариб.

Кун келар, тугайди армонлар зулми,
Гулнинг ҳижрони ҳам тугар ниҳоят.
Сени хароб этган шу битта гулни
Нечун севадирсан бу қадар аяб?

Армон – гул сифмаган манглай торлиги,
Армон – кул сифмаган икки жаҳонинг.
Армон – севилмаган дилнинг борлиги,
Армон – кўлинг эмас, кўз ёшинг қони.

Энди соғинчдан-да, муҳаббатдан-да
Ёт бир эҳтирослар юракни қамрар.
Лабларда кулгимас, заҳар бир ханда,
Кўнгилда аламмас, ёт туйғу амри.

Бу туйғу армонни гуноҳлар билан
Ювмоқ истагидан топар қаноат.
Унинг оқибатин на холиқ билар,
На шайтон билади – мусибатпаноҳ.

На юрак билади – мактаб кўрмаган,
На кўнгил билади – азоб кўзгуси.
Сени умринг бўйи эзган, хўрлаган
Ҳисга норозилик боради ўсиб.

Лекин норозилик – армон ҳиссини
Кимнинг қони билан юварсан ҳалак?
Димоққа ўтирган қасос исини
Чўпчак айтиб аритарми бир малак?

Шахризоданг қани, дўстгинам, сенинг,
Қани минг бир кечанг овунмоқ учун?
Борми бу аламнинг адоқ ва эни,
Юриб етолмаган етарми учиб?

Ўша аёлдан бахт сўрамасликка
Сенинг йигит қурбинг келмайди нечун?
Ўзгалар бахтидан тўрамасликка
Нахотки етмаса ироданг, кучинг?

Сенга бахт не керак, бахтсизлик – нега,
Гуноҳдан тасалли излаган одам?
Ёзиқларга чиқмоқ истайсан эга,
Нимангдан, кимингдан қолган бу одат?..

Ҳар неки ўткинчи: кадр, бадр хам,
Барини омонат яратмиш тангри.
Фақат гуноҳ қилмоқ эрки абадий,
Фақат юкунмоқлик истаги мангу.

1999



ИЗЛАМ

(Румиёна)

Мен ўзимни сендан изладим.
Излаш азобининг тотлари
Тополмаслик сингари қадим.
Мен сенга сочилдим тарикдай.

Мен сендан тераман ўзимни,
Битталаб ўзимни тераман.
Сен-чи, мендан йиғасан кимни,
Мен сенга кимларни бераман?

Сендан ўзни топмаслик ўйи
Юрагимга солар ваҳима.
Излам – ўйин, гизланмоқ – ўйин,
Раҳмон раҳм этмас охима.

Раҳми келган ёлғиз сенмикан,
Менга излам имконин берган?
Ўзни тополмаган менмикан,
Ўз ўрнига маломат терган?

Мен ўзимни қилдим маломат,
Сенга кудуратдан асрасин!
Сендан келар ҳар неки омад,
Мендан – омадсизлигим насиб.

Йўқотмоқнинг муқаррарлиги
Тенгдир топмоқ эҳтимолига.
Омонат – дунёда борлигинг,
Абадийдир йўқлигинг. Нега?

Унда нега сендан изладим
Мен ўзимни қонимга ташна?
Имконландим, имконсизландим
Гох интиқиб, гоҳида қақшаб.

Кимни олиб кетди бу фано,
Сеними, сендаги мени ё?

Менми, сенми, айт-чи, ким қани,
Қайсимизда адашди дунё?

Сен ким бўлиб менга қайтарсан,
Мен қайтарман сен томон ёхуд?
Менга кимлигингни айттарсан,
Машрабмисан ё Бозор Охунд?

Бу йўллар сарғарди – келмассан,
Мен ўзимни бунчалар кутдим?
Қанчалар кутганим билмассан,
Қанча-қанча изламлар ўтди.

Сени изламадим. Изладим
Сендан мен ўзимни тинимсиз.
Топмадим, бўзладим, музладим,
Кўзларимда қасирлайди муз.

На топмоқлик бўлар мустажоб,
На топмаслик насиб этади.
Излаётган кимарсанг, ажаб,
Изламасанг қайга кетади?

Топмоқ учун изламаслигинг,
Излаш учун топмофинг даркор.
Бу туйғулар нақадар чигил,
Хар чигили бир сиртмоқ арқон.

Мен ўзимни сенда суярман,
Гоҳо топиб, гоҳо топмайин.
Сени топганимдан куярман,
Куядирман топмаган сайин.

Мен ўзимни сендан изладим...

1999

КУЗ ЁМФИРИ

(туркум)

1

Хазонлар эргашди армон хайлига,
Куз виро истади кўнгил майлига,
Ёмфирлар ёғади хижрон сайлида,
Куз ёмфири,
хижрон ёмфири.

На кўз — тикарга, на умид — боғларга,
На сўз — айтарга, на димоғ — чоғларга,
На гул — севарга, на кўнгил — доғларга,
Куз ёмфири,
хижрон ёмфири.

Илинж саҳросида бир жуфт кўз сағир,
Суймоғинг осондир, куймоғинг оғир,
Қантардай умид ҳам бормоқда оғиб.
Куз ёмфири,
хижрон ёмфири.

Армон ажр бўлди, фажр бўлмади,
Кўнгил қақнус бўлди, фажир бўлмади,
На суйгу, на куйгу вожиб бўлмади.
Куз ёмфири,
хижрон ёмфири.

Кўнгил ёғар, шивалайди майдалаб,
Бир куй бўлиб, остонангдан хайдалар,
Эгам, эгам, не дардингки, қайталар?
Куз ёмфири,
хижрон ёмфири.

2

Ёмфирларда қолган дайди ит
ёрнинг тилло остонасидан
хайдалган менинг севгим.

Энди у кулбамга
қайтмас ҳеч қачон.

Дайди ўқ каби
дайди ит – севгим.

Дайди итнинг траекторияси
тақдирим бўлиб
синади ҳар муюлишда.

3

Ойна каби шаффоф шамол
йўлида учраган
нарсаларга урилиб синар.

Чумчуқларга айланар шамолнинг синиқлари
дарахтларга қўнмоқ учун
япроқлар ўрнига.

4

Ёмғир – улкан қўнгил дарахтининг
ёғаётган хазон ва рангпар
япроқларидир.
Ҳижрон тўлиб қолган бу япроқларнинг
ҳар бир сўнаётган хужайрасига.
ҳар бир япроқ симобдай оғир,
юзингга келтириб уради шамол
бу япроқларни.
Юзга санчилади мавҳум ҳижроннинг
сенсизликнинг хазон фаслида
моддийлашган тиканаклари.

5

Кузда осмон ҳақда сўзланмас,
айниқса, ёмғир пайти.

Қишки уйқусига кетади худо
осмон — кўзини юмиб.

Осмонга айланар булутлар
кузда.

Кўнгил эса
худога айланар
айтиб йиғламоқ учун
намозшомгулни.

Бахор ёди.

6

Мен – йўқсил ошиқ
энгил қилиб қияман дилни
кузнинг салқин хаволарида,
ёмғирли кунларда.

Дилим катта келар эгнимга.
Ерларга судралар дилимнинг бари.

Ёнимда сен бўлсайдинг, севгилим,
жунжикиб турсайдинг ёнимда,
дилимни ёпсайдим эгнингга.

Дилимни ёпиниб ўтирсайдинг ёнимда
елкамга бошинг қўйиб...

7

Умид
жанубга учиб кетолмайдиган
тутқун қуш каби
қунишиб турар ёмғирда
бир оёғини
қанотлари остига олиб.

Юрак томи ўпирилиб тушган
эски уй каби
вайрондир.
Унинг деворлари
шамолдан асраши мумкин умидни,
бирок ёмғир атрофдан эмас,
кўкдан ёғар...

1999



ТАРЖИМАЛАР

ПАБЛО НЕРУДА

(Чили)

* * *

Ўсимлик, шароб ёки тошнинг оти — Матильда,
не туғилган, неки мавжуд — у барининг отидир.
Бу исмнинг шуъласидан тонглар ёришар ногох,
бу исм парвозидан турунжлар ёлқинланар.

Бу исмда кемалар сузиб юрар бемалол,
йўл кўрсатар денгизнинг ложувард чироқлари.
Бу исмнинг ҳарфлари — сувнинг нукра оқими,
қакраган юрагимнинг чанқоғини босади.

Мен чирмовуқ остидан излаган ушбу исм
гўёки Боғи Эрам, ё жаннатга элтувчи
ер ости йўлагининг сеҳрли туйнугидир.

Қайноқ бўсаларингга кўмиб ташлагин мени,
жонимга қада, майли, тунги нигоҳларингни,
фақат исмингда юзиб, ухлашга изн бергин.



Севгим, бўсагача бўлган йўл узок,
сафарда йўлчини қилган йўл узок,
Ёмғирда ивийди саранар ёлғизлик.
Талталга энмади тошдан поездлар,
хануз баҳор.

Лекин биз биргамиз,
илдизлардан тортиб о, мухаббатим,
куз каби, сув каби вақийимларгача,
биргамиз бегона, айрсонлар каби
дан кўра.

Қанча қум, қанча тош, қанча шағални
дарё Бароага оқизиб кетди,
қанчалаб миллатлар, қанча поездлар

инсоният билан, чинигул билан
зуваласи битта севишган, севган
ошиқ-маъшукларни ашириб қўйди.



Бинафшадай тикандан тож кийган золим севги,
эхтирослар зўридан хурпайиб олган бута,
газаб оти яғринин яра қилган ғам тиғи,
нечун, қай йўллар билан юрагимга йўл солдинг?

Менинг барги резонлар тўзган сўқмоқларимга
нечун ташлаб юбординг хасратларинг ўтини?
Ким у сенинг йўлингни менинг қошимга бурган,
ким у кулбам кўрсатган, гулми, тошми, тутунми?

Ваҳим тунни қўрқувлар босиб келар бегумон,
шафақ қадахларини майга тўлдиргани рост
ва рост кўкдан қуёшнинг жизғанак куйдиргани.

Севги эса, севгижон бўлди менга парвона,
бағримни тилка қилди найзалари, тикони,
куйдиргижон оташи юрагимга йўл солди.



Бирга кетайлик, дедим, токи ҳеч ким сезмасин,
менинг ғуссали жуссам не дарддан тўлғонишин.
На қўшиқ, на чиннигул насиб этмади, дилда
ҳимоясиз севгининг теран оғриқлари бор.

Бирга кетайлик, дея эландим мен такроран,
лабларимда қонаган ойга парво қилмаслар.
Қон сатҳи кўтарилар, бирор кимнинг иши йўқ,
юлдузлар тиконини эсла, майли, мухаббат.

Бирга кетайлик, деса қўнғироқдай овозинг
майшиша очилгандай ташқари тошиб чиқар
азоблар, мухаббатлар, нафратлар — бари-бари

банди бўлган қоронғи ертўласидан шитоб,
оташнинг унут бўлган таъмини туяр лаблар,
тош ҳам, қон ҳам ва гуллар ҳам мени куйдирди қайта.



Ўр тошга тўқинар тўлқин зарбаси,
оламлар ёришар — потрар атиргул! —
Кўкимтир шўр томчи ва ғўр узумга
дўнади денгизнинг дунёқараши.

Эриб гул бўлади магнолиялар,
фусункор дайдишлар, гуллаган ўлим,
фанодан бақога мангу қайтишлар,
гуйилган тузларнинг эврилишлари.

Ҳимоят этгумиз сукутимизни,
мухаббатим, денгиз қийрата бошлар
завқининг ҳайкал ва минорларини.

Эҳтимол, шунданми, нам ва қумлардан
иборат кўз илмас ҳужайраларда
қувғиндан асраймиз назокатни биз.



Ишқ судраб келадир ҳасрат тўрини
ва балиқлар сокин живирин.
Уларга бокмагин — ҳеч бир жарохат
бизни айриликқа этолмас дучор.

Кўзларинг айблимас кўз ёшлар учун,
қўлларинг санчмади бу ханжарни, йўқ,
оёғинг бу йўлни изламаганди
дилга аччиқ шароб қуйилар бу чок.

Сермавж муҳаббатнинг саркаш тўлкини
бизни ирғитди-ю харсанглар томон
бир нав ундан қорди зуваламизни.

Бир ғаму ғуссага этди гирифтор,
бир фалақдан нур сочди бизга,
хаста баҳор билан сийлади бизни.



Муҳаббатим, энди уйга қайтамиз.
Балки чирмовуқлар етгандир томга,
сенинг тўшагингга сен ётмай туриб,
ёзги чошгоҳ кириб ухлаб ётгандир.

Дунёни кездилар дайди бўсалар:
Ҳаястон* — сершира асал томчиси,
Сарандиб** — ям-яшил кабутаргинам,
Янтсизи*** кун ва тун оралиғидир.

Денгиз шовқинини енгамиз энди,
қайтамиз бир жуфт кўр қушчалар каби
олис уясига баҳоримизнинг.

Ахийри, ишқнинг ҳам парвози тугар:
тошлоқ қирғоқларга қайтди умримиз,
бизнинг ўпичлар ҳам уйга қайтдилар.

* *Ҳаястон* — Арманистоннинг арманча номланиши.

** *Сарандиб* — Шри-Ланканинг арабча номланиши.

*** Хитойдаги бир дарё. — *Муҳаррир*.



Чакалазор, адашдиму кесиб олдим бир шохни,
унинг сокин шивирларин лабларимга тутдим мен.
Бу эхтимол, йиғлоқи бир жаланинг шовуридир,
ёки синган қўнғироқнинг, ё яра дил ноласи.

Ногахон йироқлардан бир нимарса чалинар,
теран-теран яширинган, тупроқ остида қолган,
намхуш ойлоқ шомлар аро, тўзғин хазонлар аро
унини куз аллақачон ўчирган бир сас-садо.

Чакалакзор уйкусидан лаблар тегиб уйғонган
ёнғоқ шохи бўғриқиб, жим куйлаб юборди бехос
ва ул шохнинг дайди иси шууримга урилди,

гўё мени излаб келмиш унут бўлган илдизлар,
менинг олис болаликда йўқотган хур ватаним.
Ёнғоқ шохин бўйларида маст бўлиб тонг қотдим мен.



Кўзларинг ёнмаса, шамсу қамарим,
ё кунранг, ё кулранг бўлмаса улар,
гар ҳаво бўлмаса тасарруфингда,
агар сен каҳрабо ҳафта бўлмасанг,

агарки бўлмасанг заъфарон лаҳза,
ё куз печак бўлиб ўрмалаган он,
агарки осмонга ой унлар сешиб,
ёпган нон бўлмасанг, хушбўй, жиззали,

суйгилим, мен сени севмасман асло.
Лаҳза, қум, ёмғирнинг хушбўй дарахти
менинг мавжудлигим учун яралган.

Кўзларим илғаган бор нимарсани,
гулим, сенинг билан бирга кучарман.
Неки бовужуддир, сенда мужассам.



Мушк-анбарлар ошён қуриб ёйилган,
намхуш қанотларин ҳорғин силкитиб
қишдан омон чиққан қушлар сайр этган
ўша тентак дара ёдингда бор-ку.

Эсларсан Момо-Ер инъомларини:
бу димоқ ёрар бўй, бу заррин тупроқ,
бефаҳм илдизлар, кўм-кўк майсалар,
жодули тиғи бу тиканакларнинг.

Эсларсан — кўпикда қолган тош каби —
зулумотдан, сукунатдан ва сувдан
олиб келтирганинг дарахт шохчасин.

Бари ғайриоддий, бари одатий,
бировлар кутмаган жойга кетурмиз,
кутган нарсамизни топурумиз излаб.



Даҳанинг сўзласин ишқ шевасидан,
мени хароб этар баҳорсиз ҳаёт.
Қайғуга мен фақат қўлларни бердим,
гулим, менга қолдир бўсаларингни.

Тўсгин ой нурина нафасинг билан,
сочинг билан тўсгин эшикни менга
ва кўзимга ёшлар тўлиб уйғонай
тушида адашган боладай гўё.

Қўлингни изларман тунги япроқдан,
сен эса зулмат ва куч шиддати-ла
бошоқлар мавжидан ясарсан мени.

Жонгинам! Зулумот чакалаклари
бордир тушларингда, кезармиз икков,
нур ҳақда сўзларсан сен менга унда.



Нур оташ бўлган эди, нон эса — дарғазаб ой,
ёсуман юлдузларнинг сирларин оширарди.
Қақшатқич севги — бир жуфт офатижон қўллардир
кўзларга ором берган, кўр берган — туйғуларга.

О севги, сен юракнинг азоб, қийноқларидан
ясаб олдинг ўзингга ажойиб бир шохсуна.
Рашк ва гина-кудурат қаршилигини енгиб
толе юлдузимизни қўшдинг ва қовуштирдинг.

Жонгинам, бизларни тинч қўймас тақдири азал,
бир кун муродимизга етказар шак-шубҳасиз,
етказмасдан қўймагай, яшашнинг мазмуни шул.

Мен, сен ва нур — буларсиз «биз» қарор топмагайдир.
Замин ва зулумотнинг ҳудудидан нарида
омон қолгайдир фақат ишқнинг сўнгги шуъласи.



Муҳаббат, муҳаббат, осмон минорасига
оқсоч хотиндай булутлар чиқар керилиб.
Ҳар нимарса кулрангланар, юлдузга дўнар;
кема, денгиз ва кун — бари бир-бир йитади.

Намнинг ларзон олчаларин томоша қилгин,
югурик бу коинотнинг ечимига бок,
ўтга қўл сол, тутгил унинг зангор ҳовурин
токи уни гул япроқлар қопламай туриб.

Ҳеч нарса йўқ нурдан бўлак, катталиқ, шингил
ва тўпори шамоллар кашф этган кенгликлар,
кўпикларнинг сўнгги сирин англашдан бошқа.

Кулга беланган фалакдан шошиб, хапқириб,
булоқлар кўзини, ҳаво ҳокимиятин
илғай олмай қолар бизнинг нигоҳларимиз.



Севмайман, севаман. Англагин, шундай.
Хаёт севмаслик ҳам, севмоқ ҳам демак.
Сўз бу сукунатнинг қанотларидир,
ўт кадрин совуқсиз англамоқ мушул.

Севаман мен фақат севмоқлик учун,
эришмоқлик учун қайтадан эрка,
ўгирмаслик учун муҳаббатдан юз, —
мана, нечун сени севмам ҳеч қачон.

Севмайман, севаман, гўё қўлимда
тутиб тургандайман бахтнинг калитин
ва дил бир балони сезаётгандай.

Севмоқ-чун кўрарман қўшалок умр:
астойдил севаман севмаган дамлар,
севаётган чоғлар чиндан севаман.



МУШУККА ҚАСИДА

Ҳайвонлар даставвал норасо бўлган,
ёки думи узундан-узун,
ёки боши кичикдан-кичик.
Ғам ейишиб бироқ кун-бақун
яратдилар ажиб бир ҳолат:
чиройли бўлдилар жуда ва жуда,
қашқалари ярашиб,
учадиган бўлдилар улар.
Мушук эса
ва фақат мушук! —
мағрур ва мукамал келди дунёга,
нозланиб юрар,
билиб босар ҳар бир қадамин.

Балиқ ё қуш бўлмоқни исташи мумкин одам,
қанот чиқаришни истар, масалан, илон,
шерликни исташи мумкиндир ит ҳам,
шоирликни — муҳандис.
Қалдирғоч бўлишга интилар пашша,
пашшага тақлидни ёқтирар шоир,
мушук-чи, у мушук бўлгиси келар,
ҳар қандайин мушук мушукдир фақат,
ҳа, мушукдир мўйловидан думига қадар,
сергакликдан илдам каламушгача,
тундан то ёнгувчи кўзлари қадар
у мушукдир.

Дунёси кўрмаган бундайин ҳолни,
бўлмагандир бундай расолик
нафақат Ой, гулда ҳам ҳатто,
бошдан-оёқ мушукдир ул.
У нукрадай, қуёш сингари
бус-бутундир ва мукамалдир.
Мулойим жуссасининг
пахмоқ кўринишлари
кема бурнидаги суратга ўхшар,
сап-сарик кўзлар
фақат тирқиш бўлиб кўринар,
тун унга ташлайди ўз тангаларин.

О, давлатсиз митти бир хоқон,
беватан жахонгир,
жажжи арслон,
томлар осмонининг султони
ёмғирли кунларда ишқ шамолларин
чорлагувчисан,
икки жуфт келишган оёқларингни
бир-бир босиб юрарсан ерда,
ишонмайгина
хар нарсани хидлаб кўрарсан.
Бунда ҳамма нарса ифлос, нотоза
мушукнинг топ-тоза оёқлари-чун.

О, сен эмин хонаки йирткич,
туннинг такаббур саркити,
эринчок, чаққонсан ҳам бегонасан,
юнгинг,
тирноқларинг қадар мушуксан.
Махфий полицияси тураржойларнинг,
йўқолган бахмалнинг қолдиғи,
жумбоқ йўқ, албатта, қилиқларингда,
эхтимол, сен унча сирли эмассан,
сени ҳамма билар — сен,
махлуқсан, унчалик сирли бўлмаган,
балки бунга ҳамма ишонар
ва санар ўзини
хўжайини, эгасиман деб,
дўстиман деб мушук зотининг,
қариндоши, шогирдиман деб...

Мен эсам — йўқ.
Мен бунинг остига чекмасман кўлим.
Мен мушукни билмайман.

Биламан ҳаммасин — хаёт, денгизни,
беадад шаҳарлар, архипелаглар,
ботаникани,
ғужбаргларнинг куёшга йўлин,
дунёнинг алдоқчи эхтиросларин,
тимсоҳнинг ғалати кийим-бошини,
зангор атавизмин рухонийларнинг
хамда ўт ўчиргич зотин сахийлигини,
бирок мен мушукни англаб етмадим,
унинг лоқайдлиги узра тойинар ақлим,
товланади кўзлари унинг.

МАРИС ЧАКЛАЙС

(Латвия)

АКБАР САРОЙИ. ШОҲ ШАТРАНЖ ЎЙНАР ТИРИК СИПОҲЛАР БИЛАН

Ўйналмокда тирик сипоҳлар.
Вожиб эрур шохнинг фармони.
Кимдир мазах қилмоқни хоҳлар
шоҳни. Лекин йўқдир имкони.

Фил лўкиллар ҳукмга кўра,
вахимали тўранинг шахди.
Пиёдага назорат керак —
шундай аъло хозратнинг аҳди.

Қовоғини уюб ўйнар шох
ва ишонар у бу ўйинга.
Титраб тургач ҳар битта сипоҳ
ишонмасдан илож йўқ унга!

Севинчдан тош қотар малика,
хаёлларга чўмар у бир дам:
гўё унга тўрпалак тикар
сипоҳ бўлиб турган ҳар одам.

Бунда ҳар иш жиддий, беҳато,
терга ботар бошдан оёғинг.
Бари жиддий — устингдан хатто
сакраб отнинг отнинг туёғи.

Шох — енгилмас. Ҳамиша қолиб.
Фақат бир ўй бермайди ором:
гўё бунда сипоҳлар қолиб
ўйнатади кимдир уни ҳам.



Бўрон кўтарилган шаҳарда
дарвозага кўнар пайғамбар қарға,
юлқир бўғотларни бўрон дарғазаб,
бўрон кўтарилган шаҳарда.

Бўрон кўтарилган шаҳарда
бор қайиқ ясашга битга қарағай,
бири тобуттахталиққа ярағай,
бўрон кўтарилган шаҳарда.

Бўрон кўтарилган шаҳарда
латишлар ўлтириб майхонада шод
ичар, идишларни синдирарлар бот,
бўрон кўтарилган шаҳарда.

Бўрон кўтарилган шаҳарда
ким урар, ким ёқар ва ким ўчирар,
курсига михланиб кимдир ўтирар,
бўрон кўтарилган шаҳарда.

Бўрон кўтарилган шаҳарда
одамлар ўрмони. Қутурар шамол,
илдизларни кўпоролмас у қаттол,
бўрон кўтарилган шаҳарда.



Кеча, туман ва кўприкда бир соя,
япроқлар остида сокин бир жунбуш.
Кимнингдир девона қилғилиқлари —
жонга тегиб кетган мангу томоша.

Ҳамлет ҳамон қийналар. Офелия —
тўққизинчи қават, ўз хужрасида.
Бугун юлдузларнинг дам олар куни.

Кимдир кичқиргандай бўлдимиз?

Ҳамон шу манзара давомийлиги:
кеча, туман ва ўз қонига ташна
кўприкда турган одам.

ЁЛҒИЗЛИК

Чолгина мактайди каптарларини
биласизми улар кўкимтир
чолгина тўхтатар йўловчиларни
биласизми улар оқ оппок
чолгина зорланмас гап очар фақат
фақат сўзлашгиси келади
унинг ўзи ўз уйи
йўк унинг ҳеч қандай каптарлари ҳам
ҳеч қачон бўлмаган

БОҚИЙ ҚУЁШ

Қочаётиб, югурар қуёш,
кетаётиб, сузиб боради.
Кимдир еб қўяр уни,
кимдир парчалаб йиртар.

Боқий қуёш, боқий қуёш...

Мис чақалар билан
майдаланган зар.
Тўғноғич-ла плакатга
қадаб қўйилган
исёнкор қуёш порлар

боқий.

Шундай яшаяпмиз:
биримизнинг нафасимиз совук,
бошқамиз —
мўйкаламни жонга ботириб,
қўшалоқ қалдироқ оралиғида —
порлаётган қуёш гумбази

бебаҳо, бебаҳо.

Унинг бори шулдир,
ўғлинг боши узра,
надомат узра,
қабринг узра,
хазонлар узра
исёнкор ва боқий
порлаб туражак.

Боқий қуёш, боқий қуёш.



Олу яна кахрабосимон,
оғрир яна қадим оғриқлар.
Ер дехқондан рози бегумон.
Нечун ҳасрат олуни йўқлар.

Тонгдан ёруғ куннинг манглайи,
тўкилади кахрабо ранглар.
ҳасратлисан, нечун мунглигим,
ширанг чак-чак томар ярангдан?


Нечун сени қийнар бу оғриқ?
Эртан тарқар булутлар бари.
Сен яшадинг. Ҳолбуки, бағри
бут бўлмайди яшаганларнинг.

* * *

Шохдаги япроқдай титрайди юрак,
қишки изтироблар қийнар бешафкат.
Наҳот омон қолур, омонлик сўраб
бизнинг пинжимизга кирганлар фақат?

Кечиб туманнинг ях титроқларидан
кузги кечаларнинг бахридан ўтган
наҳот омон қолур, наҳот баридан
менинг оғушимда тин олаётган?

Шохдаги япроқдай юрак титрайди
муқаррар хижроннинг ғамлари эзиб.
Одам тошлар қотиб алвидо айтур
титраётган баргга қўлини чўзиб.



МУНДАРИЖА

Аҳмад Аъзам. Шеър — номаълумликка таниш ишора 5

ДАРДНИНГ ШАКЛИ

«Хаёт, сен шаробсан...» 8	«Мухаббатнинг қўйлаги...» . . . 35
Тонгги Регистон 9	Тадбиркор одам 36
Аксилфалсафа 10	Хавотир 37
Аксилэкология 11	Баҳорги хижрон 38
«Одам тарошламок...» 12	Манзара 39
Хурлик 13	«Юрак узлатнишин...» 40
Наҳотки 14	«Шаънингиздан ўзга...» 41
«Сени сендан изладим...» 15	«Бахтиёр бўлишим...» 42
Қутаётган одам 16	Ёзиқ (<i>достон</i>) 43
Экологик шеър 17	Уч битик 50
Хотира машки 18	Имконият 52
«Умунан, рўй бермас...» 19	Бахшнинг севгиси 53
«Кўлларим бўм-бўш...» 20	«Қорни бирор марта...» 55
Сулук 21	Бежавоб дунё 56
Арафа 22	Ой хақида ривоят 57
«Қимнинг жилмайишин...» 23	«Бизлар узоқ чекиндик...» 58
«Хиёнат қилолмас...» 24	«Тун кечар, кун кечар...» 59
«Вақт бизни...» 25	«Ёлғизликни қияман...» 60
Зерикарли шеър 26	Илонга қасида 61
«Баҳор ҳеч нарсани...» 27	Она соғинчи 62
«Сенда айб йўқ...» 28	Ахлоқнинг пайдо бўлиши 63
«Сиз уни кўкларга...» 29	Дунёсима 64
«Йиллар ўтди...» 30	XX аср одами 66
Кузги шеър 31	«Менинг вазифамга...» 67
Кузда 32	Қуз ёмғири 68
Шаккок тош 33	Таниш белгилари 69
Кўргамахонада 34	Байроқ 70

АЁЛҒУ

«Мен — минг йил...» 72	«Ёшим дарёсида...» 79
«Қайда яшамасин...» 73	Оқланган олма 80
«Аёлни эсламок...» 74	Баҳорни қаршилаб 81
Армон 75	«Энди мен кирмасман...» 82
Тунги тилаклар 76	«Ушбу кечам...» 83
«Бир аёл ишқига...» 77	Тунги юрак 84
«Ишим шу...» 78	«Гулларим қонайди...» 85

Ушшоқ	86	«Ун бўлмаса хамки...»	117
Тезлик ва ҳаракат	87	«Кўзим, осмонларинг...»	118
«Эримас унинг хам...»	88	Рухнинг кўланкаси	119
Юлдуз	89	Бой одам	121
«Орамиз булутли...»	90	Ойбекнинг кўзлари	122
«Кечиргиси келар...»	91	Илон йилида ёзилган шеър	123
Бешинчи дарвеш	92	«Истилочи ҳарфлар...»	124
Ёлғиз аёл	93	«Илдиз ёр...»	125
«Вазифаси бор...»	94	Сўнги оташпараст	126
Ватанпарварлик	95	Метаморфоза	127
«Бизнинг эътиқодда...»	96	Қокигул	128
«Хокистар хок истар...»	97	«Одамни қамаб қўйса...»	129
Бевақт кўз очган баходир	98	Шеърят	130
Шоир	99	Ижтимоий мулк тарбияси	131
Тақриз	100	Чистон	132
«Эрмак учун чўзилмаган...»	101	«Маъзур тутинг мени...»	133
«Шайтон кишки...»	102	Гулим	134
Икки шеър	103	Натюрморт	135
Сангжумонда ёз манзаралари	104	«Қайлардасан, менда...»	136
Сен кетган жойда	105	Вариациялар	137
Эрк сабоғи	106	Тун тахайюли	139
«Севмаган ҳаётни...»	107	Машраб	142
«Бир нимарса...»	108	Олмош	143
Адашган болалик	109	«Майли, қаҳрингизни...»	144
Нафрат тарбияси	110	Кўзгу қаршида	145
«Ниманингдир олдида...»	111	Қиш чилласи	146
«Эгнимизда бир қўйлак...»	112	Таассурот иншоси	147
«Келдигим, келмагинг...»	113	Яхши туш кўрган одам	148
Ҳайрат айғоқчиси	114	«Оқартирмоқ учун...»	149
Омад	115	Аёлғу (<i>достон</i>)	150
«Ўтмишнинг иссиғин...»	116	«Сочинг зулматига...»	168
		«Бўғзимдан сиркирар...»	169
		«Айтаринг...»	170

РУХУНАТ

Ҳадик	172	«Ойлоқ кеча...»	184
«Имло лугати» дай...»	173	«Не суворий эдимки...»	185
«Тийрамоҳ боғлари...»	174	«Санамжон, кўзларим...»	186
«Сен мени алдайсан...»	175	«Ой юзидан...»	187
«Зулҳумор кечалар...»	176	«Осмон яратганнинг...»	188
«Юрагимнинг қадоқларин...»	177	«Дарахтлар жанубдан...»	189
«Мен сени тушларга...»	178	Ҳали	190
«Сен ўтмадинг...»	179	«Куйганинг мен бўлдим...»	191
«Кечирмади мени...»	180	«Тақдир пешонагни...»	192
Бухрон	181	Намозшомгул (<i>Туркум</i>)	193
«Бостириб келади...»	182	«Мажруҳ юрагимнинг...»	198
«Баҳор келар...»	183	«Муҳаббат — кўксингга...»	199

«Мен ҳам севган эдим...»	200	Истиқлол	206
Кайфият хулосасизлиги	201	Мучал ёши (<i>достон</i>)	207
Хаёл	202	Мухаббатдан сўнг	222
Кушлар саводхонлиги	203	Излам	224
«Келидинг, келмадинг...»	205	Куз ёмғири	226

ТАРЖИМАЛАР

Пабло Неруда (Чили)

«Ўсимлик, шароб ёки...»	230	«Чакалақзор, адашдим...»	237
«Севгим, бўсагача...»	231	«Кўзларинг ёнмаса...»	238
«Бинафшадай тикан- дан...»	232	«Мушк-анбарлар...»	239
«Бирга кетайлик, дедим...»	233	«Даҳанинг сўзласин...»	240
«Ўр тошга тўқинар...»	234	«Нур оташ бўлган...»	241
«Ишқ судраб келадир...»	235	«Мухаббат, мухаббат...»	242
«Мухаббатим, энди...»	236	«Севмайман, севаман...»	243
		Мушукка қасида	244

Марис Чаклайс (Латвия)

Акбар саройи. Шох шатранж ўйнар тирик сипоҳлар би- лан	246	«Кеча, туман...»	248
«Бўрон кўтарилган шаҳар- да...»	247	Ёлғизлик	249
		Боқий қуёш	250
		«Олу яна кахрабосимон»	251
		«Шоҳдаги япроқдай...»	252

ФАХРИЁР

АЁЛҒУ

шеърлар ва дostonлар

«Шарк» нашриёт-матбаа концерни
Бош тахририяти
Тошкент — 2000

Мухаррирлар: *Аҳрор Аҳмедов, Барнобек Эшиўлатов*
Мусаввир: *Елена Рахманина*
Бадий мухаррир: *Михаил Самойлов*
Техникавий мухаррир: *Диана Габдрахманова*
Сахифаловчи: *Татьяна Огай*
Мусаххихлар: *Жамила Тоирова, Юлдуз Бизаатова*

Теришга берилди 24.12.1999. Чоп этишга рухсат берилди 9.02.2000. Бичими 84x108 $\frac{1}{32}$. «Петербург» гарнитураси. Офсет босма. Шартли босма табағи 13,44. Нашриёт-хисоб табағи 7,4. Буюртма № 5020. Адади 7.000 нусха. Баҳоси шартномада келишилган.

**«Шарк» нашриёт-матбаа концерни босмаҳонаси,
700083, Тошкент шаҳри, Буюк Турон кўчаси, 41.**